


三制

垣府

疏疏

稿草





制府疏草卷上

更調守備官員疏

明 念渠蕭 彥著

題爲更調守備官員以重汛務事。據廣東按察司整飭惠潮兵巡道副使王一乾呈稱。防倭之議。千端萬緒。不外大洋火攻爲上策。但兵不在多而在精。固要選兵。尤宜擇將。今之將佐。擇之更難。職以爲見在事可用者。不宜輕聽其去。如原任碣石寨把總吳廣。其人雖椎魯。罔諳於俗。然忠肝義膽。奮不顧身。亦一時材勇之將。宜改柘林寨守備。管領官兵。與南澳副總兵共當一面。而慶遠守備。或就以周德隆對調。此今日選將之第一義等因。到臣。隨查得接管卷內。該前督臣劉某。先據惠潮兵巡道詳報。倭夸聲息前來。議行各道添造戰船。募選水兵。又慮潮州陸兵單弱。行委原任碣石寨把總吳廣。帶領標兵。前去潮州。并該府原陸兵合營團練。專備衝鋒。業經條議具題去後。今據前因。該臣會同巡按廣東監察御史王某。議照海防以水兵爲先。御兵以擇將爲要。然擇水將與陸異。擇今日水將與恆時又異。何者。陸將惟其能耳。而水將非曾經涉歷。且望大洋而目眩神飛也。安所用之。故擇水將與陸異也。人不皆生而習者。往時海波不揚。猶可僥倖無事。漸此熟習。而近者島夸之報。琉球朝鮮。相繼至矣。汛且迫矣。萬一小醜匪茹。其乘風而犯我顏行。特頃刻耳。故擇今時水將與恆時異也。切見粵東諸郡。大率濱海。而潮爲最。濱海武備。孰非

險要而南澳爲最。乃柘林者。固南澳腋肘也。此其不可無慣歷水戰之官明矣。近接邸報。柘林守備劉宗漢。推陞廣東都司僉書。而繼宗漢者。潯州衛指揮周德隆。尙未赴任。潯州臣彥所兼督地也。德隆之平生。臣彥悉之。其爲人夙慕節義。雅有儒風。以任守備。尙有餘能。顧其生長西粵。出入山嵐。於瘴情諳矣。而或昧於海防。於瘴癘習矣。而或怯於風濤。一旦驅之。最要最險之地。其能否未可知也。臣等查得原任碣石寨把總。今新推慶遠守備吳廣。該前督臣選取潮營合練。今方在潮。未得卽赴慶遠。而廣又常任碣石。日出入波濤中。其爲人軀幹甚偉。勇猛直前。雖不無好剛之過。然夙有請纓之心。懲創旣久。事體漸習。移之海寨。其能可知也。且吳廣見在潮州。而慶遠之守備久缺。劉宗漢報陞都司。而德隆之交代無期。莫若量才任使。如該道之議。將新陞柘林守備周德隆。調補慶遠。卽以吳廣調補柘林。在周德隆習于御夸。必能作一方之保障。在吳廣勇于防海。必能祛千里之夸氛。駕兩輕車。就兩熟路。不惟兩人各展所長。而兩地亦各得人。於汛務有賴矣。相應會題。伏乞勅下兵部。查果可采。覆議上請。更調施行。地方幸甚。臣等幸甚。

因事激衷懇乞天恩明職掌定經費疏

題爲因事激衷。懇乞天恩。明職掌。定經費。以便供職事。臣最不肖。皇上過而使之。承乏兩廣。而時當島寇浪傳之後。又兵防久弛之餘。春汛屆期。寢食靡遑。敢及其他。顧以督臣奉皇上命。任茲重寄。而事關兩粵。則職掌不得不明。守在兵食。則經費不得不定。職掌不明。則畏首畏尾。動多掣肘。經費不定。則瞻前顧後。行若疚心。將使後之疑今。亦猶今之視昔。督臣者。且規避不暇。何暇論於繩墨之外乎。臣故不揣其愚。輒

敢列爲二議。上干天威。以俟聖斷。其一議職掌。照得兩廣督臣之設。自正統年始。當其時事已卽罷。未有專置。至成化元年。則以都御史韓雍提督兼巡撫。而兩省巡撫俱裁。旣以雍之奏。則兩省各復巡撫。而專以軍務屬提督。旣以御史龔晟僉事陶魯林錦之奏。則又起韓雍總督兼巡撫如初。而兩省巡撫復裁。至嘉靖四十五年。東盜起。則又設廣東巡撫。而以總督兼巡撫廣西。至隆慶三年。西有占田之役。則復設廣西巡撫。裁廣東巡撫。而改提督兼巡撫廣東。至萬曆三年。仍復總督兼巡撫廣東如舊。此則督臣建置之始末也。其開府梧州。亦自韓雍始。以梧爲兩省之交。故而梧居山嵐中有瘴癘。邇年則間駐肇。肇東地也。去梧近。於西不失爲兼制。而於東更便於聯絡。以故督臣蒞任。必於蒼梧。而後乃間移之肇。以避炎爲名耳。非曰廣西有巡撫。而總督移肇慶。遂以督臣與西粵不相涉者也。此則梧肇遞駐之始末也。至於職掌。各有司存。載在勅書。自不相淆。臣查得先以總督兼兩省巡撫欽奉勅諭。略曰。人民饑荒。設法賑濟。糧儲欠缺。多方措足。軍民詞訟。量情發落。其後總督而不兼兩省巡撫也。如操練兵馬。撫安軍民。修理城池。防禦賊寇。戰守調遣。便宜區畫。如廣西狼兵。加意撫綏。如兩廣饑荒。設法賑濟。各處逃移。遣令復業。如廣西運鹽。悉心計處。具載勅諭。惟軍民詞訟則裁之。其職掌昭然矣。歷年以來。彼此遵守。循而安焉。司順土逆。則督臣與聞。糧餉出納。則督臣與聞。鹽法通塞。則督臣與聞。官員賢否。則督臣與聞。兵馬戍守。則督臣與聞。州縣建置。則督臣與聞。其他如官員給由會疏。附近府分則與。而餘則不與。大計糾劾。則不與。詞訟關係土司。例當通詳。而一切常情。則不與。里甲派徵。吏役起送。則不與。雨澤奏報。屯糧查參。衛所承襲。則不

與諸如此類。難以枚舉。然則督臣亦何嘗侵撫按職掌乎。而今者巡按廣西。監察御史錢一本之奏也。實起於奎光一塔。夫一塔之建。起于一時一念。何關職掌。該前督臣駐劄蒼梧。偶以兩學生員之呈。遂行道府議建。事干創置。且動官銀。安有不通詳之理。其失于通詳。吏書過也。上之。則該府過也。又上之。則該道過也。督臣豈得批之使詳。亦豈得尼之使不詳乎。而乃不勝其怒。遷而道府。又遷而督臣。以爲督臣謂梧爲己所私轄。致道府各官。不復知有廣西撫按。不太激乎。然此猶有因也。臣無與也。至謂廣西士紳言曰。廣東止是半箇巡撫。廣西乃有一箇半巡撫。民似不堪。果如所云。則是督臣之爲西人蠹也。焉用此贅疣。以蠹西人爲哉。臣竊思之人。臣銜天子命。有事一方。果其仁明互用。張弛合宜。吏弊掃矣。而告訐之風。不以蠹西人爲哉。臣竊思之。長武威揚矣。而雞犬之驚。無聞。法求利民。毋輕更張。事務得體。毋責細小。毋逞胸臆。毋大聲色。則官雖多。亦民之利也。而不然者。雖少。亦民之擾也。夫獨粵乎哉。除薊遼宣大專設督臣者。無論已。且以撫按言之。湖北川東不屬貴州乎。南陽漢中不屬鄖乎。是皆一箇半巡撫也。而不言擾。荆襄不屬鄖乎。南贛不屬贛乎。是且兩箇巡撫也。而不言擾。粵之南韶惠潮不屬南贛乎。是又一箇半巡撫也。而不言擾。又如湖之衡永。近屬粵西。巡按兼轄矣。是亦一箇半巡按也。而不言擾。乃督臣事務。與前之兼攝者。且自不侔。而遽曰。一箇半巡撫也。曰民不堪也。其然乎哉。夫督臣未嘗越蒼梧一步。歷粵西地也。又未嘗有一供應費民財。一詞訟破民產也。卽文移通詳。一紙之費耳。卽三院會疏。一稿之費耳。何所損于撫按。而以爲侵。又何所與于地方。而以爲不堪。以爲贅乎。此臣所不敢知也。用是敢以申明職掌。請儻蒙勅下部院。會議明悉。孰

當與聞。孰不當與聞。行臣等遵照行事。則在督臣可免於侵越之譏。而在粵西亦可免於贅疣之視。行而久之無事。耦俱無猜。有事同舟共濟。豈惟臣之幸。地方幸矣。臣聞侵官罪也。失官亦罪也。臣故不勝惓惓也。其二議經費。照得廉靜寡欲。當官首務。卽一命而上。惟是兢兢。況督臣乎。乃兩廣總督衙門。不知緣何從來有不遑之名。而業其官者。往往負不遑之議。臣自受代以來。求所爲招疑者。而不可得。旣而有言者曰。粵中除養兵外。所解軍門。每歲不下二十萬。近又有條議者曰。梧州盤鹽廠。每年約一萬兩。私解兩廣軍門。爲犒賞交際之用。乃知此二者爲招疑之囿。而臣又碌碌甚也。倘不一一陳其始末。請議定制。將使當事者視爲畏途。旁觀者視爲利藪。而持議者且視爲射的。不亦輕朝廷。辱當世之士哉。臣竊媿焉。臣非自爲計也。爲衙門計也。查得兩廣兵餉。取諸民者十三。稅諸商者十七。所謂二十萬之數。或亦近之。而自來解納。業有成規。如南雄府太平橋稅。每年以一萬兩解布政司充餉。餘則徑解梧州。如廣州夸船稅。每年二萬兩解司充餉。餘則存留該府備支兵食。如韶州府河西遇仙冷光等稅。歲約一萬兩有奇。俱解司充餉。與存留該府備支兵食。其餘如潮如肇如鹽法一切征稅。非徑解藩司。則存留本處充餉。絕未有分毫解軍門者。粵之官人。人見之。臣不敢贅。惟是梧廠備用一節。有不得不直陳於皇上。查得梧鎮之餉。其出自廣東者有三。曰南雄橋稅。曰精兵銀兩。曰廣備倉米折銀。先年督臣議貯肇慶。聽梧州道府請發。而請發之餘。卽以充隨鎮員役廩行二糧。及功賞盤纏修理一切之費。當時紛紛之話。由此而迄。今所謂二十萬解軍門之說。或由此。逮萬歷十年。督臣劉堯誨查明歷年積剩。奏報貯庫。而一切梧餉。仍解梧州。

既而督臣陳瑞又復改解肇慶。因復滋議。御史馬呈圖旋具疏請該戶部行督臣郭應聘咨覆。南雄橋稅精兵廣備等銀。仍徑解梧州如舊。其梧州廠所收鹽利竹木雜稅正餉。通報撫按。盡貯該府。分毫不得那移花銷。惟船頭備用。歲抽不多。仍聽總督衙門備支功賞。差役盤纏。修理船隻一切公用。不得復動正餉。至今因之。大約每年船頭備用等銀。多則約五千餘兩。少則三四千兩。不至如按臣所云每年一萬之多。而前三年內。存梧州者。今尚五千餘兩。亦未有盡解軍門之例。此則梧廠備用之始末也。蓋上而報功解功官軍。則有銀牌花紅額賞。而賞取諸此。次而報事報警。則有賞。而賞取諸此。又次而獻一技。陳一策。投用報效者。驗而不得收。則有量賞。以勸其來。而賞取諸此。又次而差役之盤費。取諸此。又次而船隻衙門之修理。取諸此。又次而各處公差之量賞。取諸此。又次而鎮下員役衙門吏書之例賞。取諸此。惟隨鎮官軍行月二糧。戍梧官軍年終犒勞。駐梧則取之梧餉。駐肇則取之肇餉。而賞功所不與焉。其他項款。不能一一數矣。夫使一舉而裁之。豈不大快。而勢有不能。何者。軍門事體。與他所異。羊斟之變。起於嘗羹。楚軍之奮。始於投醪。如報功解功。不則宜令之缺望。以失其心。如投用報事。則不宜麾之門牆。以阻其來。至於一遇軍興。尚有不可預擬者。而按臣曰。有功可賞。何不行道府州縣查而賞之。假如駐肇慶。亦可移文梧州。而待其至乎。且安得一行道府乎。則於勢又有所不能。臣度按臣之心。必以爲督臣者。兼東之巡撫者也。粵以西如此。粵以東可知。而不知粵東之未有解所也。何者。軍門者。蒼梧軍門也。東省橋稅精兵廣備等銀。歲輸之西者。不下七萬餘兩。以故西廠有備用。而東無與焉。蓋梧肇當兩省之中。鹽先由肇。然後

入梧。乃稅之梧。獨不稅之肇。意可知也。不然。豈其以兩省之犒賞。而專取費於西廠乎哉。按臣見梧未見肇。見西粵未見東粵。其驚心駭目。而形之論奏。不亦宜乎。臣竊以爲兩廣督臣之議。大都起于軍餉。而餉于督臣無與。惟功賞一節。欲絕之。旣勢所不能。欲仍之。則心又不白。故敢以定經費。請儻蒙勅下該部。參酌別鎮事規。臣衙門每年功賞等費。定擬若干。應否仍於梧廠船頭備用內支取。而或時有常變。用有盈縮。卽聽其衷多益寡。以羨補不足。議之以實行之。亦以實。再不得分毫。那用正餉。違者卽行議處。此外如船頭備用有餘。則盡數查出。以充餉聽支。各衙門竝不得私動分毫。如此。則督臣之心事可白。而旁觀者之猜嫌庶其可消。於西之兵餉亦可小補乎。臣惟士人行己。所貴信心。不在潔名。臣之嘵嘵。涉於爲名。而又不盡議罷也。且涉於爲利。然臣不敢也。臣觀今論者。祇知十年以前之兩粵。而不知十年以來之兩粵。視兩粵督臣。若賈人入市然。甚且以爲總督與諸司不同。而兩廣與中土不同也。臣竊羞之。人臣者果念在利。私開徑竇。豈必兩粵。又豈必督臣。卽一命而上。安所不可竇也。抑能矢心守己。豈獨下吏。卽督臣亦安所可竇也。是在人耳。且朝廷有四目在焉。有三尺繩焉。安所逃之。而至於兵餉。且重大焉。臣安敢以其身爲溝壑。而不一一直陳之乎。又安敢沽一切罷絕之名。而言之不可行。行之不可久乎。其以爲應議也。惟今日。其以爲應併而裁也。亦惟今日。臣議及此。萬非得已。伏乞皇上鑒臣之愚。俯賜查議施行。以便供職。臣不任願望。不任惶悚。

冊務方殷管理宜專疏

題爲冊務方殷。管理宜專。懇乞聖明定議。就近兼督。以便責成。以重版籍事。據廣東布政使司呈詳。奉臣批。據本司呈。准分守嶺東道左參議羅萬程咨稱。督理黃冊。原係前任參政蔡國炳奉勅坐名專理。今旣離任。相應委官帶管。緣本道駐劄長樂。距省八百餘里。文移催促。往返惟艱。獨糧儲道居省會適中之地。十府道里惟均。堪以管理。該本司看得糧道未到。議將前項冊務。仍行嶺東道帶管。候糧儲道左參議馬千乘到任之日。方送接管。緣由奉批。督冊道務。准行分守嶺東道羅參議帶攝。冊務舊何以專屬之嶺東道。該道旣稱往返甚艱。應否酌議。候糧道接管。是否長便。應否題請。仰司查明。速詳依奉行。准嶺東道回稱。歷稽嘉靖。隆慶。暨萬歷七年以前。俱係糧儲道督理。至萬歷八年十月。奉旨裁革糧道衙門。九年。卽攢造。又值本司缺官。遂以冊務坐委嶺東。維時嶺東衙門設居惠州。距省稍邇。猶得以倏往倏來。文移往返。亦不甚艱。迨萬歷十四年。題准將本道兼伸威兵備。駐劄長樂。地方僻處東隅。卽計程赴省。已約一十餘日。矧自是而南韶。自是而海北。又自是而海南。然平居無事。猶可言也。目今倭報叵測。兵食籌度。水陸隄防。雖專力圖維。尙恐不足。安能分精神於他務。又使糧道未復。猶可言也。目今糧道已於萬歷十二年七月內題准復設。事務簡易。且管轄通省。又住會城。文移便於傳遞。視之外道。迥乎不同。前項冊務。亟宜改委等因到司。該本司看得十年一造黃冊。實關重務。查隆慶六年分。係糧儲道。萬歷九年分。係嶺東道各奉勅書督造。今屆復奉勅坐名。該道左參政蔡國炳督理。今本官去任。該左參議羅萬程陞補。查得勅書原有坐名。不係接管。緣以駐劄篤遠。文移不便。欲將冊務候糧儲道馬參議至日交理。隨查糧儲道衙門

委住省會。於各所屬道里文移相宜。且無地方之責。屬之督理。似爲長便。但今尙未到任。難卽責成。況前事原屬部議。必經題請。另行頒發勅書。方便遵守等因。到臣隨查先據該司呈詳。已經批行查議。去後。今據前因。適巡按廣東監察御史王慎德養病回籍。該臣議照民數之重。自古而然。十年大造。以稽登耗。平賦役。獻之天府。副在有司。誠重務也。而粵以東道里遼闊。山海糾紛。軍民錯壤。而居夸漢竝畝。而耨。淆之則易。清之爲難。非得其人而專理之。必且以草草了事。得人矣。而道里不便。又且以遲遲愆期。以故先年督造。大都屬之糧道。而糧道旣革。則移之嶺東守道。當其時。嶺東有分守。有伸威。兩道竝存。於事爲簡。伸威駐長樂。分守駐惠州。間多移住省城。於勢爲便。乃萬歷十四年。以前督臣之議。罷伸威道。而專以守道兼兵備。駐長樂矣。其事務較前則煩。其道里較前則遠。而各郡有司。又且目攝而心易之。以爲非所轄也。雖嚴行督責。難以泄泄應之。間有批查駁勘。往來動經半載。而今者值烏夸傳報之日。尤嶺東戒嚴之辰。外之則慮海氛之潛入。內之則備山巢之竊起。責任之重大。非他時可比。顧此失彼。勢所不免。該道之呈委。非得已。且糧道業已復設。而賦役乃其專司。住在省城。道里適均。則催督便。通省有司。皆糧道轄也。視外道不同。則責成便。冊籍在糧道。賦役在糧道。則叅對便。較之以嶺東帶管。相去遠矣。該司之議。委爲可從。况蔡國炳領有專勅。而國炳已去。羅萬程接管道務。而勅尙未更。當此交承之際。正可更議之會。相應題請。伏乞勅下戶部。覆加查議。如果臣言可采。合無准將前項冊務。專責糧儲道。新任叅議馬千乘到任之日。遵照督理員下坐名勅書。併乞頒給本官祇領。欽遵施行。其蔡國炳原領專勅。另行奏繳。自後永屬

糧道以爲成規。庶責成旣便。而冊務有賴矣。

將官約束不嚴有司舉動未當疏

題爲將官約束不嚴。有司舉動未當。乞賜酌議。以杜幾微。以正紀法事。據廣東按察司。整飭嶺西兵巡道副使洪有復呈解犯人黃勝等。招由內開。問得一名黃勝云云。蒙道覆審得黃勝羅子明等徒。以欲護黨類。頑然罔知法紀。輒乘回操。倡衆突縣。至於壞門推座。殘傷物命。此驕悍之漸。胡可長也。擬配猶有餘辜。黃勝羅子明爲首。宜引刁軍民結黨之例。戍遣陳元陳會爲從。姑照原擬。婁奇管解。致金貴脫逃。罪何容諉。但審無賊。以不覺失囚論。似亦非縱。關清等雖非專責。然皆批差及全領解之人。擬杖亦宜。再照恩陽守備魯儒招稱。全把總等官奔至。論散各兵。則未必有乘機主使之情。傳箭奪文。竝屬無據。第部伍乃其素轄。籍令鈐束之嚴。曷以至是。雖事起倉卒。而責自難辭。陽江知縣湯瑞案。以人命爲重情。筮楚所加。雖失之遽。而未爲過舉。驗審初獄。爰書未就。則亦非有偏枉之跡。惟其驟然以不軌加人。則未免言之過。而少安詳之見。但該縣履任方新。他失無聞。而守備魯儒當日解散各兵。嗣亦網責首惡。當地方用人之際。合無量行戒諭。以責後效。蒙將勝等取問罪犯。議得黃勝等所犯。黃勝羅子明陳元陳會俱合依棄毀器物者。計贓准竊盜論。免刺。官物加二等。一百二十貫罪止律。黃勝羅子明爲首。各杖一百。流三千里。陳元陳會爲從。減等杖一百。徒三年。婁奇依押解罪囚不覺失者。減罪犯二等律。杖九十。徒二年半。關清李行虞三各依不應得爲而爲之事理重者律。杖八十。俱有大誥及遇蒙恩例。通減二等。黃勝羅子明各杖九

十徒二年半陳元陳會各杖八十徒二年婁奇杖七十徒一年半關清李行虞三各杖六十俱民黃勝羅子明各照例免杖徒。及照恤刑各免枷號。拘僉妻解發詳定附近衛分充軍終身。抄招報布政司轉達兵部知會。陳元陳會婁奇關清李行虞三審俱無力依律的決。追紙完日。陳元等三名定發衝要驛遞。照徒年限擺站滿放。關清等革役發落寧家。照出充軍黃勝羅子明免紙。陳元等各納民紙銀一錢。仍於黃勝等共追陪縣門一扇。價銀六錢。公案一座。價銀五錢。給匠辦料修整。鹿一隻。價銀一兩。入官作正支銷。未獲金貴嚴緝正法。人命事情聽該府檢明另結具招。併將黃勝等解審到臣。案查先據陽江縣申爲強兵擁衆搶奪人犯衝入縣堂打毀事。又據陽江守禦千戶所申爲兵變事。并據該縣揭帖爲悍將縱兵毆打良民集兵搶劫脅逼邏截事。又據恩陽守備魯儒呈爲操練軍馬事。俱經批仰嶺西兵巡道查究去後。今據前因該臣覆審大約與招同。而將官有司之過。有不可諉者。夫兵之不得不設也。設而不易戢也。所從來久矣。爲將官者時時防檢。猶懼其逸。而況可泄泄以坐視其釁。爲有司者事事調停。猶懼其乖。而況可忿忿以自離其心。乃思陽之兵非有大衆也。又皆地方召集之貧民。非四方烏合比也。其初又非有大故也。守備魯儒以防汛重務。票差營兵喚取鐵匠打造軍器。豈非公務哉。又豈非爲地方保障計。有司所當協力而圖者哉。奈之何鄉民李茂卿等事不干己。輒曰守備不當喚民匠而與之爭。爭而復與之毆。毆而復縛之。稱要送縣。當其時兵惟金勝一人耳。此其曲固已在民矣。旣而兵陳懋以遞文而至附近。兵黃金等以聞而至。分曹角立。互相叢毆。而民李茂卿以人命告。兵曾太以傷肢體告。使爲縣官者示之以大公

無我之意。而處之以從容不迫之法。審而後刑。刑而不槩刑。兵卽悍。其何辭之與有。而知縣湯瑞案之相屍也。陳懋等則先責之。件作報傷支吾。則又責之。至於曾太等不肯一驗。而曾太告驗之審兵。則又責之。及帶回縣。而陳懋等又責之。其被責者皆兵也。其告驗而不爲驗者。又兵也。雖事方審理。未見偏枉。然毋乃有其跡乎。而兵之心不勝其憤矣。使爲守備者。察其情形。密而諭之。徐而解之。兵卽悍。其敢違將官乎。而守備魯儒。且若罔聞知。而兵之心又無所戢矣。無幾何而開操。操畢而散。路經縣門。管兵黃勝、羅子明、金貴者。遂倡首糾衆。逼官改審。而湯瑞案業已退堂。黃勝等遂喊攘突入。撞開縣門。推壞公案。致傷鹿隻。當有主簿田應春諭之利害。各兵方始出門。而魯儒聞其變也。忙同把總陳著奔至縣前。趕回原營。此則其先事之大槩也。於是湯瑞案以兵變具申。而魯儒亦具申。儒之申也。則謂縣官爲偏護。而瑞案之揭也。且謂儒爲故縱。甚之。則儒謂瑞案非刑拷打。草菅兵命。而瑞案且謂儒爲潛謀不軌。傳箭裁文。維時各兵業已回營。不復敢有恣肆。而人命事情。臣行嶺西道。轉行肇慶府。提至府城公審。以兩服其心。而魯儒旋亦細解黃勝等赴道。轉解臣軍門究審。至於非刑拷打。傳箭截文等語。反覆查審。全無影響。信口反唇。有似市民刁告之狀。儒不足責也。瑞案文墨吏。亦爲之。此則其終事之大槩也。該臣看得營兵雖已喧攘。旋即解散。且罪犯未甚。一有司者治之。宜不足煩天聽。顧天下事。其始也常微。而其終也常巨。況東粵之兵。敢行稱亂。非一次矣。其大都起於文武不相調。而兵民不相下。譬之星星不滅。以至於燎原。而不可救。比比而是。卽今營兵入縣堂者。二三十人耳。其罪止於擁進縣門。推壞公案耳。臣旣以軍法於轅門外。細打

示戒。且在生死之間。而遣戍者戍。發配者配。罪如是止。而法亦如是止。兵之心如是而亦傲矣。除批行外。惟知縣湯瑞案。守備魯儒皆職官也。而一則約束不嚴。一則舉動未當。以至於此。其罪等耳。臣故欲於其微而懲之。以示文武炯戒焉。法當參究。適舊按臣王慎德養病回籍。新按臣饒位尙未入境。臣忝照得恩陽守備魯儒。勇猛有餘。識量不足。職在治賦。而不約束之於其先。兵且亂行。而反欲文飾之於其後。虎旣出柙。咎將誰諉。陽江縣知縣湯瑞案。習氣未融。褊心已甚。人命豈其不重。而扶傷告驗。獨麾而不理。能無偏護之嫌。守備豈謂無尤。而極力抵誹。且坐以不道。殊乖士人之度。召侮有自。弭變無方。卽竝處之。宜不爲過。但湯瑞案履任方始。他失未聞。雖欠周慎之防。尙無偏枉之實。儻據此議處。則恐其長跋扈之氣。而將來者難乎其爲令也。臣切慮之。魯儒當卽諭散。旋能擒解。似茲桑榆之收。庶贖東隅之失。儻覆行重處。則恐其滋偏重之勢。而將來者難乎其爲備也。臣又慮之。此二臣者。相應姑各降俸管事。以示懲創。以責後效者也。伏乞勅下該部。查果臣言不謬。覆議上請。將守備魯儒。知縣湯瑞案。姑各降俸一級。仍容省愆。視事。庶處置公平。而軍民允服。旁觀而逃聽者。亦將知所做惕矣。惟復別蒙聖裁。止議罰治。臣不勝悚切待命之至。

邊海帥臣事權未一疏

題爲邊海帥臣事權未一。懇乞聖恩換給勅書。以便責成事。據廣東布政使司呈詳。奉臣批。據鎮守廣東地方總兵官童元鎮呈稱。接到欽奉勅諭。署都督僉事童元鎮。今特命尔充總兵官。鎮守廣東地方。駐劄

會城統領伸威營原遺官兵管理惠潮各府州縣募兵并全省軍務無事操練兵馬保固城池分防通海要路剿捕地方山賊如遇事情重大調集通省官軍相機防剿參將守備等官悉聽爾節制若有南韶各處流來山寇與南贛巡撫約會行事仍聽總督兩廣軍門節制調遣民間一切詞訟不得干預爾尤須持廉秉公竭忠盡職務俾地方平靖以副委任如或因循貪悞致悞事機必罪不宥爾其勉之慎之故諭欽此欽遵伏覲勅諭首開統領伸威營原遺官兵管理惠潮各府州縣募兵蓋嘉靖四十五年惠潮地方多事議以福建總兵兼管故也又開事情重大調集通省官軍相機防剿參將守備等官悉聽節制蓋當時止有東路西路瓊崖海防四參將惠潮一守備故也今查本職所屬見有副總兵遊擊都司把總未經載入是衙門專設雖新而勅諭兼管如舊及覲廣西總兵勅諭內開撫夸道官凡事俱聽爾會行不許掣肘都司守備衛所各官如有懈於防守悉聽爾查參究治哨堡募兵敢有抗拒軍令不服查點調遣及各部軍兵臨陣退縮者通賊姦細審究是實竝聽爾以軍法處治本職竊思東西兩廣事同一體較之責任廣東尤重而乃事權未正名分罔嚴方今倭報頻仍凡稍涉乎虛文將難責其實效况天語旣出則人或諉于字樣之無預約束益難合無懇乞轉題比照廣西勅諭換給庶載掌明而遵守便號令新而鼓舞至矣具呈照詳奉批仰布政司會按察司查明報奉此隨該本司署印按察司鄭時章會同按察司署印副使游朴查得東粵地方先年山海寇盜竊發倭奴入犯惟潮州爲最故設伸威營總兵衙門駐鎮該府又有東路西路瓊崖海防四參將惠潮一守備各守一隅以多事之秋當先其急而扼其衝也嗣後寇盜蕩平

前任張總兵於隆慶五年八月內到任。寄住省城。往來靡定。至萬歷三年內。遂議以嶺表東西相距數千里。山海均屬重防。添設潮漳副總兵。專駐南澳。又設參將游擊守備把總部領各路官兵。分布防守。而總兵衙門。就於本年八月內。詳允動支官銀。于省城建立駐劄。居中調度。控制全省。今總兵官童元鎮領到勅諭。尚係始設伸威營總兵責任。未載有廣東都司潮漳副總兵。并遊擊把總于內。本鎮爲全粵主帥。三軍司命。水陸責任。關係不小。所當正其事權。以便遵守。請欲比照廣西總兵勅諭換給。似亦相應。等因。到臣。查得先據廣東總兵官童元鎮呈前因。已經批仰布政司會同按察司查明報奪去後。今據前因。該臣議照人臣提三尺劍。專制閩外。而諸司莫敢後先。豈其力能制之。惟是仰藉朝廷之威靈。以震懾於臨時。而又藉朝廷之勅諭。以宣布於平日。夫是故人無玩愒。而事有責成。東粵之有總兵也。初猶以福建總兵兼之。且劄程鄉。且劄潮州。至嘉靖末年。廣東始專設總兵。猶然偏駐惠潮。蓋其設也以惠潮。其駐也亦惠潮。故其勅諭。惓惓於伸威營兵。而他未載焉。當其時。南澳之副總兵未設也。故其勅諭。亦僅僅參守等官。而他未載焉。乃今總兵官議駐省城。而事體因革。較曩大異矣。一有調遣。則副總兵及都司官皆屬其統轄。而勅不之載。人將曰。是與我不涉也。其胡以約之。全廣官兵。皆屬其統理。而勅內獨指伸威營原遣官兵。至事情重大。乃得調集通省。人誰不曰。非重大。不得轄我也。其胡以相率。臣詳觀其勅。大都仍因先年之舊。于其中特改駐劄省城四字而已。夫平居無相統之名。則臨戎無相制之威。無事既反唇而旁觀。有事且掉臂而遠去。勢所必至。無俟問者。方今警報時聞。振刷伊始。總兵官換給之請。與兩司正事權之議。

倘亦今日之不容己者乎。相應代題。伏乞勅下兵部。再加查酌。如果臣言可采。覆議上請。合無將總兵官原奉勅書所載仲威營原遺官兵。及惠潮各府州縣募兵數言。准賜刪改。并將潮漳副總兵。及廣東遊擊都司官員。添入節制之內。仍照廣西總兵官事體。於中酌量地方機宜。略加損益。另撰勅書。頒給本官。欽遵行事。仍聽臣總督軍門節制施行。庶分閩帥臣。獲以展布。而偏裨之受成者。知奉約束矣。惟復別蒙聖裁。

制府疏草卷下

留任方面能官以奠遐荒疏

題爲懇恩留任方面能官以奠遐荒事。臣觀粵以東防在山海。粵以西防在土夷。其責任皆監司身之。而土夷非內地比也。其人則烏言卉服。其地則叢岡複嶺。兵至則鳥散無蹤。兵退則蠡屯如故。蓋兩江皆然而右江爲甚。然又瘴鄉也。有司者且人人銷沮。踣踵釋負。不復問犛獯何狀。而况守巡其地者乎。一有爭鬩。不過檄行將吏。以勘處塞責。一有事變。不過申呈三院。以勦撫藉口。而卒未有爲地方懷百年之慮。圖萬姓之安者。苟且因循。所從來矣。竊見分守右江道。右參議龔一清。心無矯飾。事有擔當。雖蠻烟瘴雨。了無難色。於窮荒深箐。靡不周巡。或裹餼糧。以拊其部落。或易衣冠。以度其山巖。自從來不見漢官威儀者。莫不且望且嘆。且警且喜。以爲從天降耶。而本官且呼而勞之。出而撫之。諸所爲隄備消弭計。漸次而理之。右江一帶。稍無越志。於是前撫臣蔡某有久任之議。前督臣劉某有久任之薦。前按臣錢某有久任之條陳。爲地方計。不得不爾。而適見邸報。龔一清以雲南副使推矣。代一清者。陝西參政顧其志也。雲南有事之秋。簡擇固當。而顧其志又精明有爲。頃者荆南之政。臣彥習之。其代辦宜無難。然臣觀之今日。而一清有不可不留者三焉。往一清議以夸方之民。不習法度。而習逃遁。繩之爲難。剿之非策。莫如量地設堡。守以夸兵。給以夸田。則可以杜匪茹之萌。則可以寢啓疆之思。蓋荔波有甲站堡。武緣有白山堡。融有攬

日堡。馬平有里團等堡。象州有藤嶺等堡。羅城有大蟲隘堡。兵不煩調遣。糧不煩區處。日有緒矣。顧夸民方在且疑。且信之介。而堡舍亦在可暫可久之間。倘一旦而去之。臣恐繼而來者。雖甚賢智。未必卽諳其地。雖能猝諳。未必卽洽於夸民。或見有商參。或身憚馳驅。其不弃前功而孤後望者。與有幾。此不可不留一也。懷遠建縣。議非朝夕。而地惡夸悍。不可以居。至今綰邑符者。儼寓不常。與無縣等耳。一清單騎荒棲。周爰相度。鼓舞有司。力肩其勞。城壘修復。不日可完。至如天河之振舉。又方新也。東蘭之勘處。又方始也。此其利害。去建堡不又大哉。始事者一清。而終事者非一清。將夸民玩視之。而有司懈應之矣。可乎。此不可不留二也。顧其志方督糧西夏。非代不得行。其赴任之期未可知。而長安去粵遠。寧夏去長安遠。其受事之期又未可知。龔一清卽令候代乎。官非其地。責成不便。縱本官不爲怠。而旁視者。其誰不曰五日京兆也。前功不墮乎。粵西監司。能有幾人。分守桂平。分巡蒼梧。以入賀行。分巡桂平。左右江陞而未到。分守蒼梧。近又報陞矣。缺官已甚。代匱爲難。乃一清者。其關係如此。而又安得聽其去也。此不可不留三也。以右江之險惡。人情豈不以去之爲快。而臣爲地方計。有不暇爲一清計者。時廣西巡按御史尙未入境。臣會同巡撫廣西地方。都察院右僉都御史陳。冒昧以聞。伏乞皇上俯念遐方。特勅吏部。覆議上請。將參議龔一清。卽以新銜兼職。分守廣西右江如舊。以竟本官之施。以慰地方之望。其參政顧其志。或卽以龔一清雲南之缺填補。或另行推補。遐方幸甚。臣等幸甚。臣不勝仰望悚切之至。

題爲取用禦倭將官事。本年八月十四日。准兵部咨。職方清吏司案呈。照得倭報緊急。京營重地。如遇有警。必得熟諳倭情之將。方保萬全。查得原任狼山副總兵陳璘。熟練海務。向樹倭功。本年正月內。該本部題奉欽依。起補神機七營參將。而兩廣總督衙門。方在委用防汛。咨留惠潮。今照彼中汛期已畢。此之倭患方殷。相應速取來京。以備緩急。案呈到部。看得遼陽之倭報日傳。將官之得人甚急。委應速爲取用。合候命下。將陳璘添註神機七營參將。本部馬上差人。守催本官星夜來京。聽候調遣等因。題奉聖旨。是欽。此欽遵。備咨到臣。當就馬上差人。催促本官束裝兼程。赴京到任。隨據本官呈稱。卑職自結髮從戎。前後經數百戰。未嘗不身先部曲。然摧鋒陷陣。非得服習之兵。利害俱與。恩信相洽者。難奏成功。茲聞倭夸擁衆。突犯遼陽。叛卒搆虜。竊據寧夏。勢甚猖獗。此正卑職捐軀報國之會。竊計抵京。必有見兵付之統領。固無不可。第兵不識將意。將不知兵情。則兵家所忌。及查嘉隆年間。倭犯浙直閩廣。皆係南兵殺敗。自是南兵遂爲倭賊所畏。職自狼山罷歸。未敢頓忘圖報。固嘗養士。亦頗精強。但爲數不多。必須添募。乃可啓行。然所募之兵。弃父母。捐妻孥。不遠萬里。而赴鋒鏑。非有厚給。何以致其死力。而樂爲用。其安家路糧。工食等銀。尤當優處。合無請乞軍門。除職見有家丁。隨帶充役。餘行東西二山并中路。將見在營兵。挑選精銳。部領起程。其領兵把總。亦聽卑職推選。平日曾經戰陣。同歷患難者。充之等因。到臣。卷查先據本官稟稱。募帶廣兵。該臣看得西變未平。東警又至。疆場多故。正臣子共念之辰。但可滅此朝食。豈得自分彼此。據璘所稱。匪獨于璘爲便。揆之臣子一體急君之義。固當如此。相應查議。牌行嶺西兵巡道。移行參將陳璘。

不問在外在營。或兩山。或肇慶。但有堪用選鋒之兵。悉聽陳璘募帶。以五百名爲率。務在五日内募足起程。至於安家銀兩。行月二糧。會議速報。就於肇慶餉內借支。俟行布政司取補去後。隨據前因。該臣詳批。本官以兵將相習爲慮。亦是長見。卽照近行以五百名爲率。許於東西兩山及肇慶標兵內。聽璘自行選帶。各將官不得阻。而隊什長卽在五百人之內。把總一員。聽璘自用。似亦計之得者。兵貴精。不貴多。旣聽璘自選。宜無不精。苟精矣。卽五百足也。而長途約束更易矣。每兵一名。念其遠行。准給安家銀五兩。衣裝等項。卽於此取之。行月糧各以三箇月爲限。念其長途之費。每兵日共給銀五分。哨隊長照本省定例行。部限甚緊。陳璘宜卽日就道。毋少遲也。仰嶺西兵巡道。備移參將陳璘遵行。仍備移羅定道。轉行兩山參將知會外。又據本官呈稱。職見帶兵往北效用。所有領兵把總。爲一營之首。必得兵機曉暢。驍勇出羣。及平素曾歷戰功。同經患難。若南鄉所百戶許應明者。方堪茲選。今查本官見在西山左營管兵。請乞批行。羅定道。卽令本官前來。帶兵速往等因。又該臣詳批。許應明旣與陳璘相習。准其帶用。本院卽委之押兵。其該營把總。另選以充可也。仰羅定道照行去後。除卽日填給勘合。催令陳璘收拾軍器完備。尅期就道。由水陸路赴用外。該臣議。照將貴有能。兵在素習。有將無兵。與無將同。有兵不習。與無兵同。故廉頗老將。思用趙人。而平原約楚。亦必二十人與俱。蓋古豪傑猶然而他可知已。陳璘之名於粵最著。而其樹功於粵。亦最多。談粵之夙將。無有兩者。伏蒙皇上拔自廢棄之中。授以京營之任。責之禦倭。必有可觀。然璘所習者。粵之兵也。所習而用者。粵之器也。璘自聞命以來。旣懷捐糜圖報之思。又切兵將不習之慮。議欲選

帶粵兵。庶幾緩急相依。似亦算之得者。况疆場多故之秋。正臣子分猷之日。而臣仰荷上恩。叨領節鉞。每見西夏東遼之報。恨不滅此而後朝食。儻璘藉粵兵。得效一割之用。則臣亦藉璘少效一念之愚。卽無璘之請。猶將計之。况其請如是。而敢泄泄焉。不先國家之急乎。用是亟允所請。而兵則取之東西二山。與遊擊之標下。約足五百。軍器則取之璘所自製。安家則人給五兩。行月糧則人日給五分。押兵把總。則聽璘自選。以百戶許應明任之。哨隊家健。與一切等費。則聽該道詳議。照本省例。而加厚給之。臨行而藤盔不足。則又行中軍官。選取二百八十頂足之。璘行有日矣。顧客兵入都城。非經題請。則不敢擅便。客兵支錢糧。非經題請。則不敢開銷。客兵經長途。非經題請。則又恐其驚人耳目。不無阻滯。臣敢先馳以聞。伏乞勅下兵部覆議。特賜俞允施行。臣不勝懸切待命之至。

島夸情形已真沿海防守宜密疏

題爲島夸情形已真。沿海防守宜密。敬陳末議。以裨地方事。臣惟廣東夙稱有事之地。然慮在山澤者十八。慮在海壖者十二。蓋海波之靖。亦既有年矣。頃雖據有琉球高麗之報。而持議者。且然且否。以爲是虛聲恐喝夸邦耳。乃今突入高麗。并其地而據之。情形見矣。彼其心不爲一高麗動。易知也。而閩廣吳越。又島夸所嘗抗顏行之地。彼其心未嘗不垂涎。又易知也。防守之備。尙可如曩者姑爲之。而姑俟之哉。臣欽奉上命。叨領節鉞。一切事所可爲。分所得爲。不敢不竭駑力。以圖報萬一。而人情狃於故常。議論岐於彼此。司度支者。或不暇念封疆。掌民社者。或不復問甲冑。或業有成議。而臣不敢更。或事關銓選。而臣不得

與是用罄其一得。列爲五條。敢徼惠於明命。庶儆惕乎衆心。伏乞勅下該部。覆議行臣。遵照施行。臣不勝
悚切待命之至。

計開

一議選補。以便責成。照得兵將相習。自古尙之。而不相習也。自古患之。廣之補兵。往皆主以將官。而不肖之官。或有因而滋弊者。自前督臣懲客兵之悍。而議選土人。近督臣復以地方多盜。皆貧民爲之。於是議選貧民。而一切責之有司。每遇缺兵。將官聞之道。道行之有司。選足送驗。呈詳收用。豈非爲地方長算。而有司者。錢穀訟獄。日萃於庭。勢不能身親其事。往往委之佐貳巡驛等官。或徑責里排舉報。而報自里排。徇私者十而十矣。選自卑官。徇情者十而五矣。謂之貧民。而不皆貧也。謂之壯丁。而不必壯也。營充之弊。又不在將官。在此輩矣。州縣官但得其人。卽送該府海防官。轉呈該道。以了前件。不復問強弱云何。及送該道。卽甚精覈。亦安能人人而退之。以取多事之嫌。不過照依有司原選。略退一二人。以了前件。而餘皆呈請收用矣。臣軍門又安能遙知其人之強弱。而進退之。又不過照依道詳。批允收用。而將官者。遂不得所從來矣。卽有不堪。隱忍而留之耳。後來者。卽欲去留一人。亦投鼠忌器而止耳。於是兵之心益輕將。以爲若不能去留我。其如我何。而爲之將者。且目懾心非。以爲利害我之利害也。獨奈何束縛我。不令我去留一人也。蓋譬之燕人造舟。而越人駕之。必無便矣。卽人人精強。而將官亦有所藉口矣。無論往事。卽如上年聞警以後。行各州縣精召沿海居民。以充潮州兵船之用。而及其抵

潮十不中一大半見海濤而目眩頭暈者。此非將官之言。潮州道之言也。則有司之不堪召兵。亦其一驗也。方今島夸叵測。防守非往日比。更絃易轍。惟此一時。臣以爲廣人之強。而習於水。不減四方。其召補士人之策。可仍也。惟是召補責之將官。令其自選。先儘土人。不足。則及客人之寄住者。大約缺兵百名。備召兵一百五十名。審其氣力如何。技藝如何。選之既定。然後以花名解送該道。逐一試驗去取。選足缺額。呈臣衙門收補。惟藝力兩優。則取之。而非其人也。不得與焉。夫驗之該道。以革其虛冒營求之弊。召自將官。以杜其推託乖異之萌。如是而復有虛冒營求者。以法繩之耳。且也。卽召兵之堪否。亦可占將官之廉貪。又一便計也。較之將官用兵。有司補兵。彼此若秦越不相關。而兵將若主客不相下。寧直什伯哉。夫此亦臣所可行業。且行之。而前督臣劉某題奉欽依。故臣不敢不以更議請。若衙門人役有缺。選用貧民。如前督臣議。則永永行之可也。伏候聖裁。

一議抽練以備緩急。照得民壯之設。卽古寓兵於農之意。較之召募調遣。相什伯焉。而行之最久。寔失其初。有司者若以謂供役使而設。而營充民壯。半係衙門積棍。亦若以爲供役使而外。無與吾事者。一遇緊急。則不得不取辦召募。一有召募。則不得復問所從來。而召募之兵。聚之易。養之難。有事而召之易。無事而馴之難。夫國家取民之膏脂。以養民兵。乃僅充一役使之用。而緩急無當也。則安用此爲哉。粵多盜之地也。山陬之防。往往不得輟。而自島夸報警。海上戒嚴。粵益多事矣。諸凡緊關處所。亦旣稍有次第。卽今議兵議餉。又且絡繹相望。而險要甚多。防守難周。臨時調發。又或有出於居恆分布之外。

將日議加募乎。則糧餉無從處辦。將坐以待變乎。則緩急又或束手。臣日夕念之。惟有操練民壯一策。而民壯有名無實。所從來久。雖嘗屢奉欽依。嚴行訓誨。亦皆槩而行之。有司者槩而應之。莫有能着實舉行者。臣切謂以操練責之州縣。雖三令五申。終成虛文。莫若立爲抽練之法。略如選鋒之制。而專其責於該道乎。州縣民兵。豈無壯夫。自守城庫獄外。豈無餘人。誠嚴革占役。於其中抽選精壯。每百人或抽二十。或三十。擇其饒于力。精于藝者。州縣送道試驗。果其中選。給以年貌疤痕腰牌。籍名在簿。名曰抽練民兵冊。每當開操月分。令其前赴該道。將一府所抽之兵。編成隊伍。設法團練。委一賢能官司之。團練之法。不必日日走陣。每當操三之期。走陣一日。餘則較筭較鈹較鎗較銃較刀。就各藝中。分其優劣。而賞罰焉。仍擇一教師教之。各隊兵藝日精。則賞及教師。仍候補哨官之缺。一營兵藝皆精。則賞及委官。仍紀錄優薦。而大歇操月分。仍令回各州縣。爲助守倉庫獄囚之用。有事聽調。其團練之月。每兵加給行糧。以示鼓舞。與夫下操犒賞。教師工食。委官月糧。俱得于兵餉內支給。不派之民。如是。則不加兵而兵足。不易兵而兵強。散之則隱然虎豹之威。用之則猛烈熊羆之陣。其集也。不數日而可到。其散也。但一檄而卽回。分之則寡。合之則衆。或亦山海兩防之一助乎。臣聞原任兵部尙書譚綸。備兵寧波日。以練民兵爲事。踰年零。倭突入。而民兵卽殲之。夫人性豈甚相遠哉。臣故以爲抽練民兵。便臣亦嘗行之各道。見在查行。而非奉欽依。非嚴賞罰。恐又視爲文具。如往日焉。臣請今後殿最各道。卽以此爲準。而有司中。敢有占役如故。與泄泄不如令者。卽夙有虛名。容臣與按臣糾罷之。庶幾人心知儆。而前

議不爲虛矣。伏候聖裁。

一、議臬臣以責成功。照得臨時易將。自古忌之。夫獨將乎哉。沿邊沿海之兵巡。其重等耳。廣海國也。自鳥夸報警。在在皆防。而潮之南澳。廣之南頭虎頭門爲最。廣司道有司。人人皆與有防守之責。而潮之兵巡。廣之巡海爲最。乃廣州巡海道鄭時章。惠潮兵巡道王一乾。皆能臣也。經理漸次就緒。而時章報陞。代時章者。且有人。臣不敢請矣。臣獨計惠潮兵巡副使王一乾。歷俸三年。給由在邇。以時章律之。序遷當亦不遠。而潮非他所比也。今之潮非他時比也。鳥夸儻入廣乎。必潮其首。潮而能殲之。則全廣安。是潮固廣之蔽也。一乾年力強壯。才識明敏。歷任既久。於潮之事。若燭照焉。儻又序遷如時章也。卽有代者。能猝至乎。卽至矣。能猝諳乎。臣故欲及其未遷之先。而以久任請。且非獨臣意也。亦地方士庶意也。臣不敢爲一乾丐澤。但乞勅下吏部。查果臣言爲地方計。俟王一乾序當陞遷之期。議以加銜再任。則全廣之門戶且賴之。寧獨潮矣。伏候聖裁。

一、議便宜以審事機。照得廣自聞警以來。其間應造之戰船。應募之兵夫。應取用之將官。應預糴之米穀。應督行之保甲。應申明之賞格。該前督臣會議奏請。犁然具矣。顧海上計議。一時難周。人情意見。一時難同。有先議增而後議罷者。則南澳城兵是已。有先議少而後議多者。則廣海哨船是已。如此之類。不能悉數。又如總兵官議設中權兵船。常泊虎頭門。則險要之地區所當允也。又如總兵官近議加陸兵一營。則樞要之地所當周也。又如南頭近議陸兵五百。與碣石限門等處近議兵船。各船又近議兵。

則門戶堂奧之間所當防也。蓋源源而來。在在而是矣。向者雖有警報。諸臣又在疑信之間。而今則情形既真。利害叵測。儻匪茹之衆。揚帆而南。不瞬息可到。其爲時甚急。而其爲慮宜甚周。固非可以泄泄聚談之日。若一一題請後行。將有緩不及事者。又如聽用將官。原題五員。內陳璘已起補京營。吳廣已調補柘林。武應隆充臣中軍。所見在聽用。祖萬松慕學二員耳。臣查得原任雷廉參將江應龍。生長海濱。熟諳機宜。原任坐營都司今退職永安所千戶康九皋。先任海總。夙稱驍勇。其告投報效。則又有原任湖廣都司張用賢。曾把圖山。狎習風濤。據總兵官呈取。則又有原任福建都司鄧鍾。向出俞大猷門下。兼通詩書。尤攻籌略。此數人者。似可備轅門籌贊之選者也。內江應龍以薊鎮論革。而雷廉有聲。臣稔知之。張用賢以圖山論革。而湖廣無過。臣在鄖時。又稔聞之。鄧鍾臣不知其事。由云何。而觀其議論。委有可采。康九皋據稱止以借襲退職。而觀其氣魄。不難一割。當此用人之際。或亦可使過乎。其他添餉補兵事宜。尙有見在查報而未及詳者。請乞勅下兵部覆議。應增補之兵。容臣便宜增補。應取用之將。容臣便宜取用。一面咨報。其已經題允而今昔異宜者。容臣徑自酌改。其未經議報。而陸續詳請者。容臣徑自准行。庶幾卒來卒應。而事可無後悔矣。臣不敢不先以聞。伏候聖裁。

一議積餉以圖實效。照得兵餉之貯。本爲餉兵而設。使餉必用於兵。而兵皆強。則雖費猶省。使餉不用於兵。而兵漸耗。則雖省亦費。故覈餉者。但當覈其餉之虛實。不當計其數之多寡。否則浮慕節省。而軍實日耗。保障日弛。久之而積弱不可支也。卽有所節。其補幾何。廣之餉有額矣。前此者。不無費用之過。

致遭瓜李之嫌。而自督臣劉某始報有積剩數目。後來沿之不改。於是粵之餉較清楚矣。而報有定額。人趨美名。有定額。則惟恐其額之不足。而或以遭嫌也。趨美名。則又恐其積之不多。而無以勝前人也。於是人務相勝。而兵不加少。餉不加多。又無有可勝者。於是多爲之方。以愚兵之耳目。而制其口吻。則爲之議曰。每缺兵百名。方請補。卽九十九人不補也。及兵稱不足。而又爲之議曰。缺兵五十名。方請補。卽四十九人不補也。嗣後不得已而改爲三十名許補之議矣。是故粵之兵之所以有名無實。而日就損也。方今島峇戒嚴。急在然眉。若復泥故守常。以避一己之嫌。萬一緩急無備。如地方何。臣以爲腹裏限數。猶可也。第不當一切限五三十如故耳。若沿海戍守。關係緊要。卽朝缺夕補。猶虞不濟於用。而况可泄泄焉。使身圖而誤軍機乎。切謂人臣之義。以不欺爲主本。以相時爲要機。諸臣當事寧之日。爲國家惜財。彼一時也。臣愚當警報之秋。爲國家固守。此又一時也。臣不敢不預鳴於君父之前。請乞勅下戶部覆議。容臣從實酌處。財可節則節。兵宜補卽補。一隨地方緩急行之。俟將來者。果積餘如曩日耶。餉自有餘。臣不敢冒爲功。抑不如曩日耶。兵自宜足。臣不敢任其咎。惟皇上鑒察之。伏候聖裁。

懇恩留任邊海極要將官疏

題爲懇恩留任邊海極要將官以備防禦事。臣接見邸報。該兵部一本。爲缺官事。內五軍五營缺佐擊正。推廣東海防遊擊彭信古。伏蒙欽賜點用。臣惟島峇匪茹逼近遼左。此疆場多故之秋。正主憂臣辱之會。粵東雖要。不要於遼左。海防雖急。不急於目前。該部選擇而推。爲計甚當。臣卽有胸無心。亦寧不知時之

緩急勢之輕重。若霄壤然哉。然臣之愚慮。有不得不冒陳於君父之前者。臣竊料島夸跣足蓬首。生長炎方。性不耐寒。遼左之地。疑非所習。卽天津山海。其寒猶遼左也。雖欲逆我顏行。亦且不能在。夏秋或不可知。若冬春有凍而僵耳。勢不得逞於東北。必且逞於東南。一逞於東南。則吳越閩廣皆其地也。島夸所嘗垂涎而飽腹者也。尙可一日安枕乎。此其不可無防明矣。粵東沿海。在在皆要。而莫有要於南頭者。南頭當大海之口。爲入廣門戶。夸儻自潮而來。則南頭首當其鋒。南頭而能堵之。則省城安。南頭而不能堵之。則省城危。而南頭又當商舟出入之口。譏察而疎。則見爲易與。而姦人之通夸者接踵。譏察而密。則見爲多事。而姦人之肆謗者盈城。以故人無有肩其事者。而彭信古獨力任之。軍火器械。置造方新。艤艦譏察。議擬方妥。蓋南頭之爲廣重。猶南澳之爲潮重也。此其不可無能將又明矣。粵中雖不乏將。率多伯仲等輩。而獨彭修古陳璘爲稱首。璘以補京營行矣。所恃者一信古。而信古又調萬一島夸之患。突入於粵。臣不敢以粵爲完計也。且以天下之才。備京營之用。當不少一信古。而在粵則如信古者。指不再屈。臣故敢爲粵請。伏乞皇上俯念粵東雖遠。於時可虞。南頭雖僻。於粵最要。勅下兵部。俯照今推。加銜留任南頭。以究信古之施。以備防禦之用。地方幸甚。臣愚幸甚。

遵明旨舉將材以備任使疏

題爲遵明旨舉將材以備任使。以重邊防事。准兵部咨。該本部題奉欽依。通行各該撫按官。不拘本處別處。見任廢閑。爲事充戎將領。果能熟諳禦倭邊海戎務者。從公咨訪真確。各據實事。會薦行來。以憑酌量。

推用等因。移咨到臣。已經通行各司道并總兵官。遵照咨訪去後。臣惟天下無必勝之兵。有必勝之將。夫將之爲人國重也。人人言之。顧南北異勢。倭敵異形。禦敵禦倭異用。自嘉隆以來。海波不揚。文武吏習於恬嬉者。三十餘年。一切禦倭。置之不講。亦三十餘年。當時二三宿將。大半老死牖下。卽今所稱材官。要皆口談耳聞。未有身親經歷者。蓋聽其言。則人人皆韓白。而覈其實。則千萬人而不一韓白也。亦安能預知其效而信之。然而高麗告殘矣。遼左震驚矣。卽山海天津吳越閩廣。處處周防矣。惟國家多故之秋。正臣子致身之日。敢不悉心訪求。以備任使。萬一時巡按廣東。監察御史尙未入境。該臣察之衆論。參以實蹟。除總兵官童元鎮。朱先見。任大將。無俟臣贅。原任參將江應龍。見任廣東都司僉書許國威。業有別疏。臣不敢贅外。臣查得原任總兵郭成。其事於廣也。廣之人。迄今道其勇。而臣聞之。其事於貴也。貴之人。迄今思其能。而臣又聞之。雖行誼曾滋多口。而材勇可當一面。且惠州禦倭之勞。至今猶在人口。此一臣者。其年幾何。臣不及知。其廢閑與否。臣亦不及知。而以臣所聞。禦倭宿將。成其一焉。成儻見在乎。可備大將之選者也。又查得見補神機七營參將陳璘。身經百戰。氣雄千夫。雖投閑而不忘裹革之思。甫起廢而益奮棄繻之志。見任廣東廣州海防遊擊彭信古。志氣超羣。勇略邁衆。捐貲以收壯丁。絕無身家之念。畢智而造利器。大裨水陸之防。此二臣者。可備大將之選者也。又查得原任廣東潮州參將葉勸。出身行伍。究心韜鈴。其初任東浙。則臣習聞其勇。其歷任東廣。則臣猶聞其槩。卽前督臣方疑其託疾而糾之。又以其獲功而薦之。旣與同官不協。以致被論投閑。人可知已。見任柘林寨守備吳廣。夙負驍雄。曾經戰鬪。起家行

伍而艱險備歷。既經廢棄。而奮勵益新。潮陽水防。倚賴爲多。雖用智不如用力。願使勇何妨。使氣求戰。將於今日。則廣有不可少者。原任廣東練兵遊擊王有麟。任把總於松海。曾樹奇勳。練標兵於端州。尤嚴紀律。第倔強易於招尤。而勇敢堪以任事。雖掛淮揚之議。不妨桑榆之收。此三臣者。可備參遊偏裨之用。而再試其成。以儲將選者也。以上諸臣。皆試於粵。而後先有聲者。臣故敢舉之。他如原任貴州清浪副總兵張奇峰。貴之功甚著。其談海亦甚辨。而臣悉其在貴。不悉其在海。見任鎮筸參將楊威。臣知其藝勇。而歷官雲貴。其堪任沿海與否。臣未之知。原任大同參將駱尙志。力舉千斤。勇當一面。而曾經倭夸與否。臣亦未之知。原任總督漕運軍門坐營俞尙志。追倭定海。署參東甌。人以爲能。臣聞其略。而未知其深。原任蘇松遊擊范朝恩。夙狎波濤。似長機變。臣亦聞其略。而未知其深。原任溫處參將吳海占。短于修行。長于治戎。則今布政使費堯年。亟稱之。福建鎮海衛千戶毛有澤。熟知海務。卓有雄心。惟小理之過當懲。據平生之長足錄。則今布政使費堯年。按察使鄒墀。皆稱之。臣亦聞其略。而未知其深。然不敢不附聞。以俟再訪。當此緊急用人之際。但有所聞。據實以報。臣之職也。亦臣以人事君之心也。至於見可而用。則該部有衡鑑在焉。故併及之。伏乞勅下兵部。覆覈施行。臣不勝懇切待命之至。

夸心難測借兵宜慎疏

題爲夸心難測。借兵宜慎。懇乞聖明覆行酌議。以銷隱憂。以圖萬全事。臣待罪海邦。本年十一月初二日。接閱邸報。該兵部一本。奏稱暹羅夸使。自願出兵勦倭。緣由奉聖旨。據夸使所稱。具見忠義。然事關重大。

還行與兩廣總督。着移文另選一能事官員。與原差官并夸使同往彼國。宣諭朝廷德意。取有回文。方可頒勅舉事。餘應行者。俱依擬。欽此。欽遵。已經通行。司道將領等官。一面選委聽候外。臣惟時事多故。烏卷告急。此皇上宵旰之辰。正臣子捐糜之日。乃暹羅夸使。以助兵請於兵部。兵部亟以聞。而皇上允之。蓋譬之醫然。急則治標。緩則治本。今固其治標時也。儻可藉此滅倭。豈惟紓目前之患。抑亦彰一統之盛。夫復何言。然而暹羅地圖。粵人得之最真。暹羅情形。粵人知之最悉。近自聞報以來。粵中士庶。皇皇偶語。不勝杞憂。而司道等官。亦皆嘖嘖言之。臣叨守封疆。若復以言爲諱。異日不幸如粵人所慮。臣身不足恤。如國事何。用敢備陳其狀。而皇上試矜而察焉。查得暹羅居極西。與滇南相對。日本居極東。與吳越相對。約相去一萬一千餘里。而界其中者。有安南。占城。滿喇咖。呂宋。琉球等國在焉。暹羅之於日本。惟是風牛馬不相及也。暹羅雖世守臣貢乎嘉隆之間。久以愆期。至萬歷元年而始貢。十九年而再貢。彼其於中國。又非素效忠誠。如朝鮮比也。乃欲悉其夸兵。越人之國。以犯兵法之所甚忌。而爲我中國効力。不亦難乎。臣竊度夸使之告。出夸使口耳。其國王之心不可知。卽夸使之告。又或出各通事有志功名者意耳。其夸使之心不可知。萬一我不能必之夸使。夸使不能必之國王。將令而不從。賞而不爲。意不以道遠爲詞。則以風惡爲解。毋乃徒示中國弱。生四夸心乎。然此猶無害也。周以狄伐鄭。而狄卒病周。唐以回紇制胡。而回紇卒病唐。若通金伐遼。通元伐金。宋之覆轍。尤有不忍言者。非我族類。其心必異。前門拒虎。後門進狼。自古而患之。今天下固全盛時也。以天下之力。禦此鳥夸。似無甚難。而乃欲借兵暹羅。臣聞暹羅之強。不減日

本其狡又不減日本而技稍讓之。以水戰則日本不敵暹羅之舟。以陸戰則暹羅不敵日本之技。藉令暹羅果提兵而往。萬一不利。必且請援於我。將拒之耶。彼固有辭。抑援之耶。則力又不給。是未收日本之功。而先搆暹羅之釁也。是兩樹之敵也。又藉今往而利也。而果能紓我一時急也。周臣有言。報者倦矣。施者未已。彼又且挾己之功。輕我之備。以爲中國無如日本何。其如暹羅何。臣恐異日之憂不在日本。而在暹羅也。然此猶可圖也。至於地方之憂。如粵人所皇皇者。臣又嘗籌之。查得由暹羅至日本。皆海也。計必用舟師。而其用舟師也。先之廉雷瓊高。繼之香山東莞廣州惠潮。達於漳福台寧。而後抵日本。蓋中華靡麗之地。無一不歷之。而粵固首當其衝者也。彼其奉檄而來。舳艫蔽空。勢必要我糧餉。而數且無定。責我賞勞。而欲且無厭。闖入我郊關。其誰禁之。蹂踐我百姓。其誰敵之。蓋狼士之兵。所過爲墟。况暹羅哉。而况奉天朝之命。以紓天朝之急。又何憚不爲哉。我問之則曰。爲中國來也。不問之。又恐其有他變也。且濱海姦人。出入夸邦。包藏禍心者。實繁有徒。一見夸兵之報。彼且投入其中。多方撥置。而廣之香山。又業有濠鏡澳在焉。不知始是何年。生此厲階。迨至於今。竊據海上。不下萬衆。幾於尾大不掉。其所恃爲羈縻者。特目前市舶利耳。而犬羊之性。終不可測。其人則又皆暹羅。佛朗機。滿喇。咖諸國之夷。而中國亡命。間亦有之。譬之瘦附於頸。留之不可去之不能。則此類是也。暹羅渡海。必將出於其途。萬一戒心叵測。而閩廣之人。積姦巨猾。若曩之曾一本。林道乾者。又潛爲之主。彼且借一釁端。突然而起。如吐蕃劫盟。故智以直入廣。廣不可爲矣。又不然。而或存留多夸於中。若曩之俺答。所以禍西寧者。然異日之害。亦寧有已時哉。而閩

越勿論矣。大都暹羅之兵，背約而不出，則損我國體，而其爲害也小。如約而出，則無益於國事，而其爲害也大。大臣又計之，暹羅卽誠心助兵，亦安能空國而行，多則三五千，少則二三千，聊以應我之命，而索我之賞耳。方今以全盛之天下，朝廷誠下尺一之詔，閩募若干，廣募若干，浙募若干，卽萬兵可以立致，而時當有事，人人思奮，卽統萬兵，寧患無人。又奚必借力於暹羅，而自見弱且貽患也。况夸使久住京師，遼左告急之狀，聞且見之，而我復借兵於彼，益示之弱耳。安知暹羅不有如關白者乎。又安知異日者，不有所侮而動乎。雖萬萬無此，然不可不爲之慮也。而或者曰：以夸攻夸，古稱上策，何慮之與。有臣則謂以夸攻夸，惟平時行之可也。操縱在我也。事急借兵，而擬之以夸攻夸，不類矣。該部之見，豈其遂不及此，而華夸地隔，旣限于不及知，忠愛心切，又迫于不暇，悉故止謂暹羅之助兵也，而不意其兵之必由海也。不意其由海而廣，而閩越也。不然，雖暹羅百請，而肯從之哉。臣非不知事在燃眉，計不旋踵，而揆之愚衷，參之聞見，以爲藉夸兵必無益，而用夸兵且有害。近之則害先於粵東，而究之則憂貽於國家。故敢昧死以陳，伏乞勅下兵部，查果臣言有據，覆議上請，亟寢前議，以圖萬全。其防剿倭夸，萬一兵力不足，或酌行各省，定以名數，選一能將，募送闕下，惟皇上用之，何患乎鳥夸。何資乎暹羅。將海波可靖，而太平無疆矣。臣不任戰惕待命之至。

積勞觸熱陡感危疾懇乞放歸以全餘生疏

奏爲積勞觸熱陡感危疾懇乞天恩早賜放歸以全餘生以重汛務事。臣竊下不肖，抑荷任使，歷撫三藩。

旋總兩粵。曾未有尺寸可以報稱者。皇上復過而使之。晉貳民部。臣受恩高厚。無以加矣。雖捐糜此身。何能報稱萬一。而臣力小任重。福過災生。入粵以來。大與風土不習。簿書之紛沓。內損其神。山嵐之瘴癘。外傷其體。飲食漸減。痰涎旋壅。自秋徂冬。日不能支。然臣猶以國恩未報。不敢顧身。兼之京察在邇。嫌於託疾。又復勉強支持。力疾任事。而爲時愈久。受病愈深。逮至冬盡。浸入四肢。痿痺不仁。跪拜無力。危急之狀。日日以甚。屢延醫生。王經文等診治。而卒無分毫之效。咸云勞熱傷脾。其根已深。非謝事靜攝。必無痊可之期。即使謝事靜攝。而其痊可。且有不可知者。此兩粵士民所共見。臣非敢一毫詐託也。以庸劣如臣。分當待黜。何敢望趨新命。以危急如臣。豈獨不能趨新命。卽欲依期候代。而力亦有不支者。况今海上戒嚴。戎機旁午。豈其奄奄牀褥之軀。可以臥理。而新督臣陳夔。又方候代粵西。受事無期。臣儻不陳情乞身。萬一山海交警。緩急無賴。臣一身不足惜。如國事何。用是敢哀鳴於君父之前。伏乞皇上察臣悃款之愚。於臣沉痾之疾。特勅吏部。准放歸田。至於總督事務。則粵西乃督臣兼轄之地。查之往牒。自粵西陞轉。亦有不候彼省撫臣之代者。容臣徑齎旗牌。交新督臣經理。庶汛務不誤。愚分可安。臣幸而痊耶。猶得與田野。氓歌詠太平。卽不幸而不痊耶。亦得遂首丘之願。死且不朽。臣愚幸甚。地方幸甚。


按。邑志。公有司諫疏草三卷。視師疏草二卷。都諫疏草四卷。撫滇疏草三卷。今皆無所見。而唯此制府疏草二卷。邑志不載。乃巋然獨存。蓋世隔年遠。其家藏本無幾。適錢鄭二志前後迭修。悉送志館。不知爲誰何攜去。送歸於無何有之鄉。而此二卷之存。正以未上志館故也。今按明史有云。自塞上

多警邊吏輒假招降幸賞。公建言降人處內地非便。又按公門人廬陵劉日升所作公行狀有云。某侍郎過聽某比部郎。寃殺四人。而真盜就縛。先生極論之。此當卽是肖軒公寶退錄中所載周世臣荷花兒事。江陵裁冗官。後唯

先生力陳。山東南糧道並裁非便。計議最覈。此當在司諫疏草中。明史公閱視陝西四鎮邊務還。奏訓兵儲餉十事。並允行。當在視師疏草中。明史初行丈量法。延寧益田。高文薦請三年征賦。公言二鎮多沙磧。奈何定永額。詔購金珠已停市。而命以直輸內庫。公言不當虛外府以實內藏。尋言察吏之道。不當視催科爲殿最。部議允行。而張佳允以舊例請。又疏爭。劉日升行狀上詔司農取珍寶折價。皇女誕生。詔取賞用。秋祭山陵。又詔取賞用。先生三爭之。承運庫銀作局。御馬監中貴並有所請。先生皆三爭之。再上書言新建新會當從祀廟庭。下禮臣議。允之報可。此當在都諫疏草中。明史定鄧子龍兵變。撫納孟養車里修貢。劉日升行狀疏救李中丞材誥誤。當在撫滇疏草中。又公撫滇之先。曾巡撫貴州。明史都勻答千巖苗叛。土官蒙詔不能制。公檄副使楊寅秋破擒之。宣慰安國亨僞言獻木及徵木。無有爲公所劾。是公又當有撫黔疏草。劉日升行狀公所刻有用夏錄。籌海重編。今皆不存。可惜也。明史日本欄朝鮮。暹羅貢使請勤王。尙書石星因令發兵。公請罷其議。星執不從。而暹羅兵卒不出。今唯此疏具在冊中。洞悉島情。曲中利害。其他若定經費。重汛務。及海防事宜。五條皆經國之遠謨。禦倭之要策。又補史所不及者也。余旣憫諸書之不傳。而又深幸其尙有此冊。故互取明史及行狀所載。詳識於此。俾後之人知之。書之傳也有自。而其出也有時。後之君子。與我同

制府疏草 卷下

志爲補刊之可也。嘉慶六年三月二十七日。後學趙紹祖識。



三 垣 疏 稿

許 譽 卿 纂

本館據藝海珠塵
本排印初編各叢
書僅有此本

三垣疏稿卷一

明 許譽卿字公實·號霞城·江南華亭人·明萬歷癸丑進士·歷官都給事中·入本朝·遜於僧·號寐庵·事具明史本傳·

吏垣十二疏

爵廕太輕等事疏

題爲爵廕太輕。紀綱日替。敬抒狂瞽之愚。仰塵聖明之鑒事。臣惟爵廕者。磨勵天下之名器也。而濫被之餘。其流遂不可止。紀綱者。約束一世之大法也。而凌夷之後。其漸至不可長。臣五年外吏。荷蒙聖恩。拔置首垣。踵頂可捐。莫能報稱。竊見年來起廢途開。冒濫竇啓。添註之額。寢廣疏通之術。愈窮業經。臣同官孫紹統。郝士膏。先後具疏。臣不須再瀆。顧臣所久蓄於中。而不能無說者。則爵廕一途是已。自兩朝登極。凡我臣子。恩廕頻仍。疊疊若若。不知凡幾。比因皇子誕生。普天同慶。一時閣部而下。以及三品京堂。復人廕延子孫。甚且有以講讀之勞。而徼恩晉秩者。幾年之間。三沐覃恩。臣子遭逢。可爲極盛。然分量亦可謂極盈矣。乃日覩傳奉聖諭。又以三鎮宣捷。加恩文武諸臣。夫武臣戮力封疆。酬功自有成例。至諸輔臣。晉階錫廕。臣竊惑焉。不知當該鎮奏捷之年。諸輔臣果盡在事。爲禁中頗牧。俎上折衝否乎。倘且夕黔蜀成功。遼左恢復。皇上於諸輔臣。又將以何階何廕加之乎。況當此仕途濫觴。人情躍冶之秋。憂時者政思

有以隄防之辭榮表讓。斷當自輔臣始。臣知元輔平日克讓。是其本懷。此一舉也。必借諸輔臣力辭。而我皇上收回成命。恐亦不待陳詞之畢矣。至錦衣一官。卽古之金吾。查世襲非軍功不得濫予。此祖制也。遠不具論。卽如尙書趙彥之血戰中原。御史張銓之殉難絕域。甫廕一子。而今保姆之屬。閹尹之流。紛紛傳奉。至有爲兵部所不敢執爭者。使海內聞之。妄謂陛下所以報勞臣任事之功。恤忠臣烈士之節。僅僅與婦寺承恩者等。謂祖制何。其何以鼓舞豪傑。而抑止僥倖也哉。臣故曰。爵廕太輕也。至紀綱之替。則又有不勝痛哭流涕者矣。慨自^闕十^字山左妖氛。閩海紅夷。接踵見告。此何番漢臣賈誼所言首居下。足居上者。三輔之內。同時而劫辱二令。輦轂之下。一日而盜殺六命。種種駭聞。況掠私財未已也。寢假而截奪官餉。乃半出脫逃之悍兵。豈朝廷捐重賞以募之者。不爲紫塞之貔貅。適爲綠林之蝨賊乎。侮縣令未已也。寢假而迫脇柱史。且近屬管轄之門卒。豈國家不惜厚糈以飽之者。未爲抱關之壯士。先爲脫巾之首亂乎。綱淪紀斁。至於今日。掃地已盡。而臣所尤異者。則在內監李實之叅楊姜也。實雖奉敕督造。不過一中貴耳。欲使五品職官。以屬禮周旋。俛仰其間。姜必不甘。況姜果違悞。上供錢糧。堂堂撫按。豈其庇一有司。實獨不當知會。聽其以白簡從事。而乃矯焉思逞。舉撫按參劾之權。一旦自實侵之。彼旣魚肉府官。其何有於縣令。彼且股掌撫按。其何有於監司。將來吳越間。不眷眷多事哉。且實疏入。則陛下有提問之旨。撫按疏入。則陛下有庇護之旨。是陛下所信者在該監。而所疑者在撫按也。將置撫按於何地矣。臣在吏言吏。故敢冒昧陳愚。因論內之爵廕。并及外之紀綱。若此。誠以不忍重負陛下拔置禁掖鴻恩。而隱忍緘默。自

愧言責。用是卽犯雷霆之怒。斧鉞之威。亦有所勿顧也。疏入。帝不納。得旨。罰俸半年。

疆事焚棟可虞等事疏

題爲疆事焚棟可虞。朝議築舍未決。乞敕閣部大臣。立斷大事。毋持兩端。以誤邊誤國事。伏念臣以草茅初進。罔識忌諱。仰干聖怒。荷蒙日月之照。天地之寬。不加顯誅。姑示薄罰。臣方戰慄未已。何敢復有所言。顧臣再思之。皇上置耳目侍從之臣。豈徒使唯唯苟容。取充位已哉。臣若不言。是溺職也。是畏罪也。且重負皇上震威之盛德矣。臣請冒昧言之。今海內用兵。所在騷然。而最急者。莫如薊遼。九邊開釁。無處足恃。而最吃緊者。莫如薊遼之總督。自督臣王象乾以艱聞。蓋兩月於茲矣。長安雖兒童走卒。皆知此地此官。一日不可缺。并一日不容緩。乃廷臣方議推。而督師輔臣忽議裁。今靜聽又二旬矣。而啓事杳然。夫輔臣豈真欲裁督臣哉。欲裁督臣。則必如臺臣黃尊素疏稱。直任到底而後可。然薊遼正有事之日也。督臣非添設之官也。無事猶設。有事則裁。臣同官程註一疏。洞中肯綮。業已奉旨矣。而調停觀望者。謂何。豈登萊之撫臣不可裁。而薊遼之督臣乃可裁乎。倘謂督師輔臣意難重違。則臣又有說焉。從古自任任人。事無兩可。臣讀輔臣前疏。有云。居密不居東者。勿推。任撫不任勦者。勿推。同功不同過者。勿推。以及畏勢。要顧局面。愛便宜者。勿推。則是輔臣胸中。再四熟籌。明明有一當推之人。際此呼吸存亡之秋。輔臣何不直告於皇上。所謂不自任。則任人。可兩言而決也。而臣因是益不能不責望於今之閣部大臣矣。遼左一事。旣以戰守二字。斷送封疆。復以防撫二字。停推總督。茲何時也。喜峰口入犯之報。猶曰傳聞。而韓宗功等之

奸細。則現獲有據。萬一闖入內地。雖朝推督臣。夕往受事。其何能及。此真可爲痛哭長歎息者也。而欲爲廷推計。亦自可兩言而決。何者。疆場事大。情面爲輕。直當問其人之堪任與否。更不當問其人之肯任不肯任也。嗟乎。年來卿寺填滿。幾無坐處。而遼撫缺出。必借才於外臺。今司馬之堂。累累若若。而危邊重寄。動稱乏人。豈一時雅負物望諸臣。以之折衝樽俎。則有餘。而以之禦侮封疆。則不足。不亦重負明主之知遇。而虛糜國家之爵祿也哉。臣共居漏舟之中。未見衣衾之戒。漸處覆巢之下。不聞戶牖之圖。輒不勝杞憂。緯恤。痛言至此。伏乞皇上毅然獨斷。或敕督師輔臣。自擇總督。或敕閣部大臣。立刻會推。務令邁往該鎮。與舊督臣交代。庶撫局可終。防著亦固。彼卽有叵測之謀。我自有預備之策。而巖關艷靄景象。目前得少安矣。疏入。得旨報聞。

聲罪之罰未彰等事疏

題爲聲罪之罰未彰。敍功之賞日濫。懇乞聖明。惜名器以勵人心事。臣惟治天下之大權。無過賞罰而已。罰不嚴。則法多凌夷之患。賞不覈。則人生徼倖之思。張裔之稱諸葛亮也。不曰刑不可以貴勢免。爵不可以無功取乎。蓋剏印不足成事。敝袴必待有功。賞罰二者。誠不宜偏輕重。而以觀今日之朝廷。何其罰有佚。而賞太僭也。天驕日逞於塞上。而未能效犂庭之舉。夜郎自雄於海中。而未遑興問罪之師。國威至此。亦大褻矣。然猶曰彼勢方張。而我力未逮耳。至若逃兵逃將之律。何不一切無赦。使知國有常刑。驅官驅餉之奸。何不直窮到底。使知法無漏網。臣恐自此以往。貪夫債帥。惟知剝軍肥己。攫青蚨以自娛。惰卒驕

兵誰肯臨敵忘身。觸白刃而不顧哉。其究國家卽欲以罰隨其後。亦無及矣。而賞則有不可勝言者。陸贄有言。當今所病。方在爵輕。設法貴之。猶恐不重。若又自棄。何以勸人。由今而觀。爵賞濫觴。何以異此。腹裏而猥稱邊棒。守土而競言軍功。於是前者收逐鹿之利。後者動見獵之心。狂瀾一決。不可復止。而近日中州。敍功一疏。撫臣馮嘉會。又已加銜廕子矣。往歲妖民竊發。兩河赤子。非無震鄰之驚。然未若二東有屠城略地之慘也。銷萌窒釁。雖有勞勩。亦撫臣職分宜然。豈曲突徙薪之功。必當與焦頭爛額者同日而語。而敍其身。又及其子。毋乃太濫乎。況死守孤城之朱燮元。躬冒矢石之王三善。協力進勩之何士晉。猶必待事平優敍。而嘉會先叨此廕賞之典。其何以使蜀黔粵軍中。不人人解體也。臣非不知成命已頒。亦非有所求多於嘉會。但長此不已。後將安窮。然則浙之葉朗生。吳之陳鼎相。先後就擒。亦可以戡亂稱功。甚之貪財激變。遷國圖存之李樑。公案稍冷。熱中猶存。恐未必不耽耽焉冀論功而脫罪矣。惟名與器。不可以假人。臣待罪吏垣。封駁無能。然豈敢不爲朝廷名器惜。而不一糾繩之哉。抑臣於此。而有感於刑罰之不明也。反坐一律。平民誣告且然。況上而越奏者乎。科臣朱大典糧事已明。則舉人鹿之麟罪案已定。乃置其首而坐其從。恐所稱刑不可以貴勢免者。殆不如是也。臣故因論賞罰。而併及之。伏惟採擇施行。疏入。得旨報聞。

慎起居以保聖躬等事疏

題爲慎起居以保聖躬。容直諫以弭天變事。臣聞君者。天之宗子也。故君之一身。乃天所託重之身。必重

視其身。毋一念屑越。一事戲豫。而後天心之眷顧益隆。蓋從古人主之能敬天者。未嘗不自側身求道得之也。我皇上勵精爲治。從諫如流。二三年間。河清鳳見。天人相與之際。感應不爽。庶幾其中興之美乎。乃邇者風霾晦日。地震湧川。自輦轂以及近畿。所在告變。而聖體違和。適與時會。一時中外臣工。不無惶惑。未幾臨軒視朝。聖容碎穆。數日以來。天清地寧。聖作物睹。人情又無不恬然愉快矣。而臣杞憂罄恤。猶不忘警誦。仰佐宸箴。曰慎起居。曰容直諫。毋乃迂而不切於事。戇而不切於時乎。然臣言雖戇。而非迂也。請得而誦言之。皇上天縱精神。日升川至。偶爾靜攝。容何傷。而臣所深憂者。正此無傷一念也。臣讀漢史。袁盎有言。千金之子。坐不垂堂。聖主不乘危。不徼倖。夫漢文帝恭默思道之主也。而盎爲此言。其防之深。而憂之遠矣。今皇上固可爲堯舜。陋漢文於不足尙者。臣知一舉念。必不敢有所屑越。一舉動。必不敢有所戲豫。要使深宮宴閒之時。常若細旃嚴密之地。一切伐性之謀。蕩情之具。不得伺隙而投。乘間而中。斯清明在躬。志氣如神。宗廟社稷之身。有泰山磐石之慶矣。臣所謂起居宜慎者此也。臣又讀漢史。本始四年地震。是時郡國四十九同日震。宣帝詔問經學及賢良方正之士。因釋直諫夏侯勝等。爲諫大夫。地節三年地震。復詔求直言。有曰。乃者地震。朕甚懼焉。有能箴朕過失。以匡不逮。其毋諱。夫漢宣帝弱齡嗣位。因變求言。竟成中興令名。又況我皇上幼冲踐祚。聰睿天成。度越漢宣萬萬者乎。前者諸臣因地震上言。類得嚴旨。不勝駭愕。雖聖躬方在靜攝。罪以聒瀆。其亦何辭。然諸臣所言。一一皆忠愛之言也。願皇上從此推漢宣求言之心。明詔在廷臣子。勿以近日一二譴罰爲戒。寧作對仗之馬。毋效抱葉之蟬。務期極言過

失於此永消災異。共答天心。至於被逐言官。如毛士龍等。亟爲賜環。毋使夏侯勝得耑美於前史可也。臣故謂直諫宜容者此也。抑臣於此不能無望於閣臣矣。宋神宗時。以災變減膳撤樂。王安石言災異天數。非關人事得失。富弼嘆曰。人君所畏者天耳。若不畏天。何事不可爲。將使輔弼諫諍之臣。無所施其力。是不可不速救。然則今之閣臣。將爲安石乎。將爲弼乎。此際止宜以保身敬天。納諫用人。爲責難陳善之第一義。恐非區區素服角帶。足了修省之故事也。敢不避愚戇而并及之。疏入得旨報聞。

革職貪臣巧附名賢疏

題爲革職貪臣巧附名賢。大千清議。乞敕法司拿問。以儆官邪。以存國法事。臣辦事本科。見原任御史。今爲民徐縉芳一本。爲遵奉恩詔。控陳異寃事。奉聖旨。徐縉芳已經詔赦。不得又來奏辨。該部院知道。欽此。臣不勝駭愕。何物縉芳。魍魎魍魎。敢晝舞於青天白日之下也。豈未聞近日吏部飭法懲貪之覆疏乎。凡撫按參劾有司。臚列多賊者。不拘年力資格。拿問追賊。以三七爲率。一年不完。聽部科參處。業經奉旨申飭矣。有司如此。況御史以風憲犯賊者哉。縉芳作令江南。穢聲久著。乘驄淮上。醜態愈彰。蓋當年手書之露蹤。與爰書之列狀。鑿鑿有據。得免荷戈。倖從褫斥。茲姑不必再污白簡。臣所深恨者。則縉芳疏中所稱。上書爲顧憲成別白生平。遂觸世網等語。臣始不得不直折其奸矣。憲成臣鄉之賢者也。生平自在。何待別白。且縉芳自視爲何如人。而代憲成別白耶。憲成有知。當不瞑目於地下矣。尤可異者。陽借恩詔。陰遂私圖。而且一則曰。臣不敢因皇恩之浩蕩。徼廟堂之寬政也。再則曰。臣決不爲顧破甑。燃死灰計也。夫巨

萬之賊。孰非民間膏血。一旦肆赦。遂令網漏吞舟。廟堂既已寬政矣。更欲何寬。乃敢肆無忌憚曰。聖朝不宜有不明不白之刑章。臣子不宜有不明不白之公案。其詞若有深憾焉。然則必使縉芳破甑復完。死灰再熾。而後釋憾於聖明乎。甚矣。縉芳之膽包身。而罪通天也。聞縉芳匿影都城。暗希打點。臣非不知其腰纏十萬。百足不僵。必至錢可通神。毒能射影。然臣生平疾貪。自爲司理已然。況待罪吏垣。敢不如鷹鷂之逐。使貪夫敗類。翩翩其來。爲聖世清明之玷也。伏乞敕下法司。緝拿縉芳。追贓正罪。投畀有北。毋令天下嘆赦者小人之幸。并爲後來貪吏嚆矢。地未必非今日飭法之一大首務矣。疏入。得旨報聞。

吏治日擾等事疏

題爲吏治日擾。民生日囂。乞敕所在有司。以收拾人心爲第一義。毋徼功以滋亂事。臣聞天下之大勢。靜則治。動則亂。天下之人心。與之以靜。則各安其性命。而不肖之心。銷擾而動之。則人將自危。而寢成其瓦解之勢。夫民顛愚而易犯法者。性也。麗於法而治之。如其人。如其法而止。而民乃安然不驚。一或濫觴於法之外。株連其人之餘。而愚民始惶駭眩亂。喪其神魄。求解免於須臾之死。而無端之牽引。捏造之風波起矣。燭火燎原。蟻穴潰隄。所當深懼。故治天下者。慎無動之。屬者遼左之訶也。其初繩之急。而備之疎。視以折箠可使。而不料其伏屍流血也。此擾之過也。蜀以徵兵擾。而永寧叛。黔以襲替擾。而水西叛。齊魯以牛車擾。而鄒滕妖黨叛。今日國家兵甲四起。兵民交困。事事以擾致之。乃者遼民之僑居登萊也。而幾又以奸細之言擾矣。幸而明旨煌煌。消其隱禍。則亦社稷之靈也。若東南浙直之交。羣涓輩以恫喝脇

人財。而富家兒率多憨狂不檢。大言易信。而務外不根之人。易投。然而實非有斬木揭竿之勢也。比於盜賊。盜賊死。而比於妄男子。則妄男子死耳。死如其法。死固無怨。罪如其人。人亦勿驚。如指龍華蛇山名色。而必欲一網以包羅之。恐江淮吳越之間。愚者駭。智者疑。弱者喘。勇者譁。人無樂生之心。而蠢蠢有累卵之勢。此亦今日闕十吏以鈎距爲功名。嗟乎。天下豈堪再擾也。夫民未亂。而喜事者。若恐其不亂。及至亂形見。而束手無可柰何。則又安若靜治不擾。而共享太平之福。爲得策也。臣俯察天下之大勢。不幸什九類此。私憂過計。惟望諸輔臣靜以持之於上。勿令羣有司動而擾之於下。庶其無速亂乎。而首輔葉向高。且屢疏求放矣。夫天下方擾。擾欲動。非首輔功成身退之日也。宋元祐間。司馬光已得疾。因青苗餘法。猶在西夏亦未寧。嘆曰。四害未除。吾不瞑目矣。詔光肩輿三日一入省。光謝不敢當。乃令子康扶入對。是古之大臣。未嘗堅拒詔也。今遼左淪亡。黔蜀多難。何如西夏。年來加派頻仍。海內虛耗。司農仰屋。至奪長吏之秩。而民間殊不堪命。又何如青苗餘法。且首輔之病。未必如光。而我皇上溫諭敦留。不啻如元祐故事。首輔獨漠不動念乎。而令光專美前代耶。臣因蒿目治亂。而轉及此。乞敕首輔立出視事。弘濟時艱。至於吏治宜靜毋擾。臣芻蕘所獻。倘聖明以爲可採。仍敕下吏部覆議申飭施行。則天下民生幸甚。疏入。帝從之。

君側不可不清等事疏

題爲君側不可不清。英斷不可不決。乞聖明割恩正法。以消禍本事。臣歷觀漢唐宋以來。未有不以宦官

弄權禍國者。漢時鄧通方愛幸。一戲殿上。丞相申屠嘉得而檄召論斬。其後侯覽王甫輩朋結趙婕妤。操弄國柄。太傅陳蕃身且不免。釀成黨錮之禍。而漢始不振。唐時閻興貴干預外事。李商隱一長安令耳。卽收繫獄。事聞召見。宣示百官。其後王守澄仇士良輩專制國政。勢傾中外。平章宋申錫李德裕相繼獲罪。卒致甘露之變。而唐遂以衰。宋時任守忠離間兩宮。左僕射韓琦坐政事堂。出空頭敕召之。安置遠州。其後童貫梁師成輩竊弄兵權。雜出詔旨。而執政如蔡京王黼。復相與表裏爲奸。故都人一目之爲媼相。一目之爲隱相。而宋祚竟移。若是乎此輩之禍人國也。殷鑒不遠。聖明在上。豈意有大逆不道。跋扈無禮。如左副都御史楊漣所劾之東廠太監魏忠賢者。漣疏臚列備悉。臣不必再爲更端。皇上試取其疏。而一審閱之。如內外盤踞。暱比交通。爵廕纍纍。羊頭狗尾。視漢之朋結趙婕妤者。有以異乎。如紊廷推之制。奪金吾之秩。停黃門之遷。以及冤斃青衿之命。生殺予奪。盡在其手。視唐之勢傾中外者。有以異乎。又如內操烏合。憂在蕭牆。中旨濫觴。斥及忠鯁。至於道路傳聞。實繁有口。甚有爲臣子所不忍斥言者。視宋之典兵矯詔。謀間兩宮者。有以異乎。是忠賢之身。乃合侯覽王甫王守澄仇士良童貫梁師成任守忠諸奸而爲一人。至其僭擬陵寢乘輿等事。又漢唐宋前代所未見。蓋不赦之法。無將之誅。更爲過之。而區區鄧通閻興貴。不足相比數矣。臣意漣疏一入。皇上必赫然震怒。立賜處分。庶幾稍洩通國之憤。乃漣疏竟奉嚴旨。而忠賢疏且先取溫旨。旣念其積勞任事。又慰其小心供職。臣始不勝駭異。臣不知奸逆如忠賢。何者爲任事。何者爲小心。而侈口翹直。尤屬欺罔。且皇上亦知忠賢之所以不置辨乎。自知罪狀難欺。欲辨而不能辨。

也。皇上亦知忠賢之所以求自罷乎。自知國法難逃。欲不罷而不敢不求罷也。皇上英斷天成。亦可以蚤決矣。宋臣有言。大臣不言。故小臣言之。今漣大臣言矣。而皇上猶未斷自淵衷。臣雖小臣。又安敢畏罪而結舌不言哉。臣恐自此以往。大小各官。真知有忠賢。不知有皇上。萬一忠賢大奸大惡。日甚一日。更有進於漣疏者。亦皆觀望緘嘿。以遵旨爲戒。不發一言。而皇上乃真孤立於上矣。惟言莫違。聖有明訓。皇上獨無懼乎。臣非不知忠賢口含天憲。股弄廷臣。漣疏無如之何。何有於臣。然臣承乏言路。目擊忠賢積惡貫盈。天特假手於漣。以暴其罪。而仍令網漏吞舟。實國家治亂安危所係。故繼漣之後。昧死上言。伏乞皇上毅然乾斷。毋以忠賢一人。而杜天下忠愛之口。此一舉也。臣知諸輔臣必勸皇上割恩。必成皇上正法。當不令申屠嘉韓琦耑美於前矣。疏入得旨。以稱引古今不類申飭。

微臣因事納忠疏

題爲微臣因事納忠。敬推廣列祖徽猷。乞聖明每事紹法。以臻盛治事。邇者恭遇皇上將幸國學。一時都下士民欣欣相告。謂再覩辟雍聽講。冠帶圓橋之遺。臣亦雀躍私頌曰。若是乎皇上之法祖崇儒。稽古不倦也。蓋自神廟登極。四年視學以後。僅見此舉。雖偶以聖躬微恙。傳諭改期。而鄭重大典。擇吉另行。聖心敬慎一念。中外共仰。傳之史冊。於燦哉。祖孫濟美。光昭千古矣。臣因閱皇明寶訓。大政諸書。誦揚祖烈。伏念可爲皇上今日法祖之要者。謹條爲八事。敢冒昧以進。而無諱可乎。臣查洪武六年。上諭儒臣詹同曰。朕思聲色乃伐性之斧斤。易以溺人。其害甚於鴆毒。創業垂統之君。爲子孫之承式。尤不可不謹。同對曰。

陛下此言。誠子孫萬世之法也。是時上已生十二皇子矣。而慎戒聲色若此。今皇上雖春秋鼎盛。而血氣未定。亦聖人所戒也。況離照當陽。前星未耀。聖躬萬年有道之長。聖子神孫萬年瓜瓞。茲斯之慶。關係甚重。得無聲色在旁。有如祖訓所稱。鳩毒易溺者歟。此皇上之宜法祖一也。嘉靖六年。上因大學士楊一清等。請儒臣進講大學衍義。上曰。令直解參以時事。以開朕學。又一日。諭輔臣曰。朕見顧鼎臣所講洪範。盡心指解。詞語多長。恐有失記。著少刪幾句。從容講說。發明朕心。蓋世廟留心典學如此。所以英斷萬幾。成中興之令名。今日講帶星而入。日出而罷。講官片晷開陳。不知能盡心如鼎臣否。而一切重大時事。上關主德成敗。下係國是定傾。曾開參解一二。如祖訓所謂開發者乎。此皇上之宜法祖二也。弘治十八年。上召大學士劉健等。至煖閣議政事。上袖出數疏。指一揭帖曰。此巡按御史所奏地方盜賊事。須加緊鎮巡官。又指二疏曰。此科道所劾兩京官作何處置。又指一疏曰。此太常寺欠行戶錢鈔。昨有旨查。部覆未明。須別爲處置。可見孝廟用人理財。及四方盜賊水旱。無不事事諮度。乃下所司施行。今國家多事。倍宜勵精。皇上視朝之暇。獨不可一做煖閣故事。召對輔臣。商確大政。俾親承裁決。而後奉行乎。此皇上之宜法祖三也。宣德六年。上諭六科給事中曰。爾官近侍。職在記註。凡朕一言一令。內使傳出者。當備錄覆奏。庶防欺蔽。不然。必有詐僞。蓋祖制防微。有深意存焉。今中書爲政本重地。乃稟擬大權。已拱手而授之內廷矣。每有傳言。動成鬧市。絲綸之體掃地。中旨之燄薰天。雖司封駁者。莫得而執奏焉。其何以杜欺僞乎。此皇上之宜法祖四也。永樂四年。有上時政者。都御史陳瑛劾其狂妄。請置之法。上曰。草野之人。不知忌諱。

勿以直而廢之。又諭尙書鄭賜曰。拒諫之事。明主不爲。瑛非助朕爲善者。卿等戒之。大哉王言。真求言若渴哉。今章奏一路。非不批答如流。然歷數卿寺詞林言路諸臣。建言譎降。歲不乏人。予玦經年。賜環無日。近部曹萬燦。一言觸忌。可憐。又以杖下之餘魂。化爲萋弘之碧血矣。短言者氣。而重損聖德。如文皇帝不罪直言之意何。此皇上之宜法祖五也。洪武二十年。詔焚錦衣衛刑具。先是官民有犯。俱屬法司。其有罪逮至者。間令收繫錦衣衛用事者。因以非法凌虐。上怒。遂有是命。此卽天地好生之心也。今廠衛人犯。一奉打問之旨。楚毒備嘗。年來復盛用立枷。士民槁項而立斃者。不知凡幾。冤鬼哀號。道路側目。近廷杖之端。漸至流毒搢紳矣。不重拂高皇帝好生一念乎。此皇上之宜法祖六也。萬歷十七年。及三十六年。蘇松等處水災。上憫江南重地。自糧米改折蠲免外。又存留歲造緞匹等銀。以備賑濟。一二子黎。賴以全活。誠浩蕩之恩矣。年來蘇杭織造一事。撫臣爭之不得。杜門求去。科臣駁之不得。挂冠以行。今商羊爲祟。遠過昔年。輔臣疏請蠲賑。而亦以減織造爲言。蓋念三吳杼軸其空。饑荒薦至。嘔心爲國。良非得已也。皇上何不近按皇祖成例。俯從閣議。稍寬東南今日之民力乎。此皇上之宜法祖七也。洪武元年。上諭宦官不得典兵。謂侍臣曰。吾觀史傳所書。漢唐之禍。雖曰宦官之罪。亦人主寵愛使然。向使宦者不得典兵。雖欲爲亂。其可得乎。三復此諭。慮蓋深遠矣。今禁旅日繁。內操未罷。寄狼虎之蹤於蕭牆之內。聚金革之氣於心腹之間。此舊輔葉向高所謂今日似無可慮。而他日終屬隱憂者。近去國餘忠。又惓惓以暫輟爲請矣。皇上猶未動念乎。則國初典兵之禁。何不一深長思也。此皇上之宜法祖八也。臣非不知隱默足以容身。不

宜冒瀆天威。然臣伏見臣同官陳惟新一疏奉旨有云。言官有真心爲國。條畫實政的。自見採聽。又云。但不得空言沽直。借事邀名。臣以此知聖心覺悟。捷於轉圜。原未厭薄言者。臣茲條上八事。皆祖宗奕世徽猷。方册犁然具備。非空言也。倘皇上景行前烈。事事設誠致行。無疆令名。還歸皇上。臣亦無直可沽也。臣一念樸忠。用是不避狂瞽。因視學之後。敢以法祖爲規。竊自託於宋人曝背之誼如此。惟陛下少留意焉。

疏入留中。

計吏首重懲貪等事疏

題爲計吏首重懲貪。獎廉必先旌異。乞敕當事諸臣。慎舉卓異。以勵庶官。以光大典事。臣惟國家三年一計羣吏。蓋倣虞廷明試之典。於以慎考課。嚴黜陟。至公也。近經科道列款上陳。部院奉旨議覆。無不以懲貪爲第一義矣。官邪日甚。賄賂日彰。自部科摘發饋遺。度一時中外人情。又無不毛骨俱聳。肺腸盡換。庶幾覩清明世界矣。尙臨期貪黷成風。簠簋不飭。自有拿問追贓之例在。蓋貪吏處。則廉吏得以自見。如阿大夫烹。而卽墨始封。從來賞罰互行。不少錯貸。然則廉吏又何不可爲也。願獎廉則莫如卓異一節。向來雖按故事。不一覈實。使僞廉者售。而眞廉者反絀。臣竊憤焉。遠不具論。如天啓二年。吏部條陳卓異。重守輕財。非不甚善。乃臣待罪浙中。見清介絕俗之劉可法。獨擯而不舉。臣至今惜之。今天啓五年。又屆期矣。該部斷宜申飭各撫按。一切上而藩臬。下而郡縣。必實實清畏人知。一介不取。若而人。始以備舉。自非然者。卽力可排山。才能倒峽。勿畏牆壁。勿狗香火。輕以辱此典也。萬一外舉失實。而部院考察異同。科道風

聞參駁。卽以連坐舉主。庶贖鼎不至。夤緣充數。而一二清廉有品者。得書名御屏。仰叨異數。其於輯瑞貢琛之役。不亦大有光哉。乃臣更有慨於中矣。計期在邇。部院相須。闕一不可。近清嚴秉正之孫瑋。旣已騎箕而上升。忠憤嫉邪之楊漣。又且剴印而勿予。必得夙負丰標。力持清議其人。始克勝任而愉快。倘有人焉。乞靈於奧窔之間。而巧踞夫風紀之地。此其糊心不辨。涇渭。猛氣更多。柵柴。恐將來大計黜陟。關係不小。廷推諸臣。可漫勿加之。意乎。如臣言一得可採。乞敕吏部。酌議施行。疏入。報聞。

欲全元輔之體等事疏

題爲欲全元輔之體。當允司空之去。伏乞聖斷。以息煩言事。臣觀元輔葉向高。前後居政府數年。當皇祖朝。斷大疑。定大事。如撤閩璫於磨牙吮血之餘。出福藩於尾大耦猜之際。豈不表表在人耳目間哉。迨事我皇上。適值東西用兵。加派日困。而又以票擬中移。平章失柄。心力俱竭。堅意乞身。章凡數十。始得旨以去。去之日。猶多惜而留之者。而近何突來人言也。臣竊訝之。乃推厥由來。則坐工部尙書陳長祚之不去耳。夫元輔臣師。長祚臣師之師也。臣何敢言。然長祚真老矣。古人七十懸車。長祚自視何如。略不引年乎。宜去者。一旦人言長祚者數數矣。耐彈不去。古有幾人。今人情實應且憎。長祚豈充耳不聞乎。宜去者二。有此二宜去而不去。於是一二者。因長祚之不去。而轉咎元輔之去。不意皇上更因元輔之去。而未允長祚之去。臣恭繹明旨。有人言太逼。牽引座師等語。若因而遽允。殊非朕優禮老成。矜念元輔之語。是皇上若以長祚之留。爲厚元輔耳。不知長祚不去。則人言不息。無論非皇上所以厚元輔之意。恐長祚今


日之所以報元輔者亦甚薄矣。長祚豈遂忘元輔行前欲其先去之言乎。臣愛元輔不得不愛長祚。且臣不得已而出此一言。勸駕歸山亦正臣所謂愛長祚之深思也。況長祚未去徒以陵工垂成耳。臣意長祚雖去而他日斂工有姚思仁之例在。長祚又何必棲遲不決。甘以垂耄之身作衆射之的哉。伏乞皇上卽允長祚之去。以謝言者。仍罷斥臣以謝長祚。并謝元輔。臣言至此一切知罪有所不問矣。疏入。帝不納。

輔臣失禮違時疏

題爲輔臣節節失禮。已涉於慢。口口違時。更涉於欺。謹據疏直糾。仰祈聖鑒事。先是輔臣魏廣微。因臺臣胡良機指及枚卜一事。盛氣而陳。有時局不容等語。夫輔臣平章天下。何者謂局。何者謂時。臣已心異之。日者頽歷不至。陪祀後至。一日之中。再失禮焉。臺省疏糾。豈苛求於輔臣哉。臣恭誦兩番溫旨。雖輔臣事上無禮。而皇上則始終使臣以禮。斯亦臣子之希遇矣。爲廣微者。引罪束身可也。引疾乞身亦可也。而復滿口以時局爲辭。臣讀其疏。一則曰。時局諸臣業得臣之隙。再則曰。乞加罷斥。以快時局之心。則大可異焉。夫頽歷朝廷之禮也。陪祀宗廟之禮也。夫有何局。糾其不至。爲朝廷守禮也。糾其後至。爲宗廟守禮也。夫有何局可快。而乃以白簡爲兇鋒。詆言官爲此輩。不亦始而慢。終而欺。重無禮於皇上哉。臣言及此。輔臣必又以臣爲時局。然臣惟不解時局二字。故敢直糾其藉口違時。以蓋其失禮之罪如此。惟聖明少垂察焉。疏入。帝不納。

老成可惜等事公疏

題爲老成可惜。言路宜容。謹合詞籲天。以存國體事。臣等因看議晉撫事。爲降用諸臣懇恩。此臣等六垣之言。非爲首一人之私言也。奉旨沈惟炳降用矣。臣等方相顧內愧。又見冢臣趙南星。憲臣高攀龍。以此事相繼奉旨著回藉矣。臣等益不勝駭愕。何庸復言。已再思之。會推巡撫一事耳。國家未得撫臣之用。而以一人之言。先失諸臣。又使宰憲二老臣一疏立斥。恐祖宗朝所未數見也。臣等捧誦明綸。雖曰出自聖裁。顧皇上從來禮貌大臣。優容言官。卽如向日大小臣工。章滿公車。皇上未嘗以齒馬之嫌。譎及言官。而不意今日雷霆之怒。疊見摧折。并統鈞之地。風紀之司。不少顧惜。取一二老成人。世所望爲歲寒松柏。百尺無枝者。速之去國。乃爾。且朝廷進退大臣。應自有禮。若使部院之長。一朝咄嗟而去。有司庶僚。攜手同行。身輕似葉。無論揆之國體。所傷實多。亦豈我國家數百年培養人才之意乎。至於惟炳承乏首垣。又以公疏獲罪。將令後之言者。且爲著樹之蘿。誰肯爲生庭之軼。且爲伏籬之吠。誰肯爲立仗之鳴。其勢必至結舌相戒。不敢深言。而天下事乃可慮矣。臣等職掌所關。用是不避補牘。伏乞皇上。從此親信輔弼。慎重絲綸。待大臣以手足之恩。任言官以耳目之用。將宗廟社稷。實式憑之。而時事尙可爲也。疏入。以瀆擾爲首者。降一級。調外任用。



三垣疏稿卷二

兵垣五疏

追論通逆元奸疏

題爲追論通逆元奸乞聖明明正其罪以儆將來事。臣觀逆璫魏忠賢在先朝猶然一闖豎耳。雖口含天憲。隱然有狐假之威。尙未敢飛而食人也。自奸輔魏廣微居之爲奇貨。欲借以倒翻世界。故相與表裏爲奸。欺罔熹廟。而一時小人之苟富貴者。輒壇坫奉之。於是甘心掃門。呈身入幕。實繁有徒。而忠賢羽翼成矣。臣嘗疏劾忠賢。因勗輔臣懇請熹廟。割恩正法。而未引蔡京王黼往事爲喻。蓋以陰刺廣微。又以廣微疏辨失禮。藉口時局。語涉支吾。駁其欺君。廣微肺肝畢露。遂切齒恨臣。適值矯旨逐冢臣趙南星。憲臣高攀龍。科臣沈惟炳。臣循職掌。公疏爭之。而中有著樹之蘿。伏籬之吠等語。重忤權倖。復相與搆臣之罪於廣微。而臣乃得旨降調矣。臣去之後。言者以臣爲戒。廣微呼吸氣靈。忠賢驅除手竦。馴至公侯滿門。生祠徧地。馴至變亂祖宗法度。殺害天下忠良。馴至兵權利權。悉歸閹宦。九邊漕運。並置私人。幾年來有司搜括恐後。海內遂至空虛。邊臣貢諛爭先。封疆無一足恃。夫孰非廣微倒授太阿。使包藏禍心。圖危社稷。一至於此。我皇上旣磔忠賢。復斫崔呈秀之棺。跪而斬之。以謝天下。至神武也。獨廣微奸諛之骨。雖寒而欺

罔之罪未正。遂令當年入幕。巨慙改口展辨。硬冒擊邪。今臺省交章。憤戎首之作俑。恨渠魁之漏網。皇上縱念大臣。不卽按以交結本律。亦望毅然獨斷。查照逆瑾事敗。奸輔焦芳等例。暴其罪狀於朝堂。褫其逆魄於地下。且以作將來大臣榜樣。毋令續薪傳之脈。開宵壬捲土之端可也。抑臣之去。爲爭南星攀龍而去。南星攀龍之去。爲參一呈秀而去也。今呈秀爲何如人。則南星攀龍爲何如人。既見雪消。水落石出。彼二臣者。蓋棺之論已定。易名之典宜加。又寧待臣言乎哉。熹廟以此疏斥臣。荷陛下洪恩。卽以此疏復臣官。故不敢自昧其本末。而一申白之。疏入。帝從之。

論劾之冤宜雪等事疏

題爲論劾之冤宜雪。薦舉之濫宜澄。謹平心一言。以質公道。以存職掌事。國家設立言官。封駁糾彈。自有職掌。不得已而有薦舉。非其心也。蓋正直忠厚。雖當並存。而古稱諫官。必曰殿上之爭。仗下之斥。則糾駁之意居多焉。惟邇年逆璫用事。有承望中旨。首劾楊漣等。以快其私憾者。卽有借此立題。欲興大獄。以逐三案之異已者。於是每人分題。每題命意。某人論某人。某人論某事。讒言高張。忠良短氣。海內士夫。貶竄誅戮。殆無虛日矣。此等糾彈。其於職掌何居。而吏刑二垣。從無一言駁正。方且連章頌莽。極口美新。以賢書爲佞錄。以督學爲奉祠。甚至甘心從逆。不顧臣節。有爲華歆。鄙慮其人者。舉祖宗設立言官本意。棄若弁髦。此朝廷何等時哉。迨皇上卹忠起廢。屢廛明旨。而猶敢把持吏部。或明操線索。或力扼要津。相與詘其所忌。伸其所喜。先其私人。濫與賜環。以爲廢者未嘗不起。是足以巧應明旨矣。後因物論譁然。始變爲

訪冊而無骨冢臣。仰人鼻息。直待戎政一疏折衷。乃以臣等幾人塞責。而其寫照處。則在以被劾續查四字。鋼諸臣。以遇缺銓補四字籠臣等。且就幾人中。不難將死作生。占缺首垣不補。資深之郝士膏。今尙繫白駒於空谷也。沈應時一毫無罪。積俸有年。一番賜環。祇博得一番投荒也。是何逆璫欲超遷人。則捷於轉圓。聖主欲起用人。則艱於轉石乎。無怪乎言者憤憤。略舉廢籍姓名。入告皇上。而借此徇私者。紛紛薦剡。致仰煩聖諭矣。忤逆璫者薦。附逆璫者亦薦矣。爲逆璫所處者薦。非逆璫所處者亦薦矣。濫觴至今。幾於有舉無劾。間有一二被劾。最快人心。而薦者又踵至矣。夫由前論劾。皆知爲逆璫爪牙也。由今薦舉。焉知不爲逆璫樹羽翼也。乃欲護論人。尙概擯被論之人。且不覈所薦之人。及還按薦人之人。而賢路久鬱。倖竇旁開。則臣所謂其冤宜雪。而其濫宜澄者。恐亦剝復之機。治亂之局也。嗟嗟。年來年例一推。逆璫爲政。吏部承行王鳴玉一疏。和盤託出矣。乃昔日例推。中旨起用。而妄竊賜環之名。近日例推。明旨起廢。而竟絕賜環之望。何悖謬也。卽如蔣允儀。彈王紹徽。紹徽掌院。卽以例推。且授指門牆。攻之削籍。此其橫遭摧折。又前此年例所無。不當立補臺班。竟其審諤之用哉。奉旨日久。而啓事杳然。該部不得不執其咎矣。至臣生平。經。在。先朝未嘗妄薦一人。祇因卓異太濫。偶舉清介之劉可法。爲之榜樣。原疏自明。而論者因臣一言。波及可法。豈知浙撫會推。在趙南星與臣去國之後乎。臣至今惜之悔之。今又何敢爲年例諸臣丐恩。亦第存此一段公道。期不負皇上召還言路之職掌而已。疏入。帝從之。

仰遵聖諭等事疏

題爲仰遵聖諭。俯竭愚忠。伏祈聖鑒。以存職掌事。本月十一日。皇上躬御文華。裁決政務。臣於會極門候直侍班。見同官章允儒等。接出聖諭。戒勉言官。仰見皇上留心章奏。念及屏斥諸臣。懷忠欲吐。亦既聞言。若渴矣。又恐言者風聞失實。甚盛心也。臣因自反。臣在先朝。屢疏忤璫。再劾奸輔魏廣微。因獲罪以去。比廣微初結逆璫。臣微聞其事。遂劾廣微。不意其後果濁亂朝政。流毒忠良。迨蒙恩復。還言路。引焦芳例。追論其罪。荷皇上震怒。奪其官。是臣始劾廣微。亦未始不出於風聞也。臣謂言官入告。以實。誠不宜有風聞言事之心。然臣誦高皇帝聖諭。不云奏對之際。或畏避不能盡其詞。或倉卒不能達其意。故嘗霽色以納之。惟恐其不盡言也。至於言無實者。亦略而勿究乎。文皇帝不嘗諭尙書李慶等曰。彼所言過失。若誠有。卽因而改之。豈非善德。若果無之。於汝何損。罪之。將重其名。而益朕與汝等之過乎。我皇上每事法祖。而今有此諭。臣恐傳之海內。書之史冊。妄謂皇上雖無拒諫之心。而未免有厭薄言官之迹。則臣之所深惜也。且皇上謂大臣不安其位者。爲輔臣耶。冢臣耶。樞臣耶。近日一二言官。雖不無指摘。然輔臣固日直中書矣。樞臣冢臣。亦赴平臺召對矣。南科臣已奉嚴旨。冢臣復奉溫旨。似亦可以安其位矣。萬一以一人之言。而槩責言官。恐冢臣於心反有不安也。且皇上亦念及當年魏廣微秉政。周應秋秉銓。崔呈秀秉樞之日乎。彼惟先箝言路之口。使畏罪不敢言。而後乃相率媚璫。幾危社稷。今聖明在御。人思靖共。萬萬必無此慮。而明主圖治。當慎未然。忠臣愛君。必防其漸。倘言官從此各以遵旨爲戒。相顧不發一言。後縱有廣微輩出。復蹈前轍。恐下有不及言。上有不及聞者矣。則又臣之所深懼也。至於言官持己不嚴。官常決裂。

實爲敗羣。法宜嚴處。惟是論人不當。乃引反坐一律。臣知聖心不過欲就人論人。據實而言耳。非真惡聞其言也。何也。以先朝誣劾楊漣等諸人。亦未一一反坐也。豈其寬於彼而獨嚴於此。諒亦聖明之宜洞察。而閣部大臣之宜深思者矣。臣刀俎餘生。感皇上錄之摧折之後。復玷侍從之班。臣條上封事。半屬封疆杞憂。未嘗妄有攻擊。儘可緘默求容。而踵頂鴻恩。捐糜圖報。竊慮皇上本以懸輶設鐸之盛心。而令臣下或有箝口結舌之隱慮。故敢昧死上聞。伏惟皇上少垂矜焉。疏入得旨。昨發科道諸臣一諭。正欲爾等今後有言。務要捐去成心。持平論議。詎禁言者。其中反坐二字。係朕面語。何得聒瀆不休。妄生猜忖。本當處治。念係賜環。姑不究。該衙門知道。

聖明望治甚殷等事疏

題爲聖明望治甚殷。臣工敬事宜亟。敢一言申儆。以襄泰運事。臣觀三代而下。爲臣子者。慨想唐虞之際。每嘆有臣無君。今恭遇皇上日御文華。數舉召對。一切講學勤政。親賢遠奸。事事必法堯舜。有君如此。何忍負之。臣謹據膚見。條陳可與廷臣交儆者有五。敢盡言之。而毋諱可乎。一曰。輔臣納牖宜勤。書曰。爾無面從。退有後言。若是都兪之朝。不廢吁咈。貴相成也。今聖明天縱。誠莫能及。但股肱大臣。往往將順意多。弼違意少。臣近讀記注。有云。朕與卿等商確。或是或不是。卿等須直言。是上明以匡。正望輔臣矣。輔臣又何憚而囁嚅不盡乎。恐責難陳善。未可當聖世而失之也。一曰。言官論事宜平。夫君仁臣直。誠美談矣。獨不曰多諷少諫乎。今科臣廷諍過激。致蒙擯斥。宣付史館。恐下受其名。而上任其過。臣甚惜之。竊謂諸臣

有法言。自不可無巽言。無輕批鱗。自干靈怒。庶立仗之馬。可免一鳴輒斥。而黃臺之瓜。不至屢摘欲稀。將來傳之史冊。無重貽皇上以逐諫臣之名。諒亦愛君者所同然矣。一曰。銓部職掌宜明。祖制會推。爵人於朝。科道例得與聞。防欺蔽耳。近奉旨。雖戒把持。而仍責省臣以不行參駁。聖慮深遠矣。臣謂銓部用人者也。科道論人者也。凡遇會推。銓臣須一意擔承。如啓事得人。科道循例畫題。不則有參駁之明旨。在。庶言官不受把持之名。而銓部亦不得諉於職掌之實也。一曰。法司讞獄宜確。國家設三法司。端主折獄。若鎮撫司。不過以緝奸宄耳。皇上登極。詔焚錦衣衛刑具。可謂同符太祖矣。近法司以一二事比律未允。致啓聖疑。故張宜夏一案。始下金吾。不善奉行。聞先拿本犯。後赴刑科。補僉駕帖。豈不大違祖制乎。宜勅法司。以後大小之獄。必以情不得情者罪之。而皇上亦每事必付法司。毋使海內。謂當明允之朝。而輕開詔獄之端可也。一曰。大臣出處宜審。祖宗朝。臣子乞休。允放有體。惟神宗垂拱末年。閣臣情面相狗。始有幾懇天恩者。近南司馬商周祚。一疏卽放。識者未嘗不服其高致。今何屢病而屢留也。夫條而杜門。條而視事。其於去就大節何居。況病非假託。便當勇退急流。若二豎原未作祟。而徒假一番溫綸。謝一番人言。則援而且止。勿欺之謂何。豈煌煌明旨。僅僅與七發同功耶。而司稟擬者。亦每借密勿之絲綸。爲人作留行文。字亦褻王言甚矣。以上五款。雖卑之無甚高論。總欲偕在廷臣子。精白乃心。於凡論思補闕。共存一忠愛之心。折獄用人。各矢一公虛之念。而至於進禮退義。爲廉恥名節所關。尤不可纖毫苟。且期不負我堯舜之主而已。其於治平之泰運。倘亦不無小補乎。如臣言可採。伏乞聖明少申飾焉。疏入。帝嘉納之。

科臣被言咆哮等事疏

題爲科臣被言咆哮。微臣就疏駁正。乞敕下會勘。并敕南臺臣據實回奏。以息紛囂事。臣前月二十六日。辦事本科。卽聞科臣薛國觀突疏加臣。臣候召對間。隨奉明旨。臣不勝惶悚。據疏中橫誣臣以東林主盟。結黨亂政。而誅其心。不過因臺臣袁耀然參及。無可抵飾。乃巧借申救同官章允儒爲口實耳。臣敢述商確公疏數語。平心折之。先是舉行枚卜。臣病註籍兼旬。始終不聞會推。冢臣可問。銓司可問。廷臣皆可問。誰爲一手握定。臣不受也。後允儒奉旨處分。偶劉斯球等謂臣曰。臺臣已擬有公疏。垣中尙無定屬。臣曰。臣子處分。總繇聖裁。然衙門公疏。亦相沿職掌也。論科應吏科爲首。論官應都給事中爲首。蓋與薛國觀商之。以都給事中。惟國觀在耳。斯球等遂別時。沈惟炳并不在坐。安有疏稿授之。且云公疏。則非私議也。國觀爲首。臣亦列名。如臣爲首。國觀亦列名者也。臣在先朝。曾以一疏首降處矣。使果有疏。何憚不言。況臣豈不知國觀之爲人哉。而必強其書名也。若結黨亂政。臣子大罪。何可輕以加臣。臣從廢籍。蒙恩召還。在兵言兵疏在御前。有一不從國家起見者乎。臣若肯結黨亂政。則逆璫用事時。何不可隨衆求容。必屢忤奸邪。抗疏去國。今聖主勵精。明時坦蕩。又有何黨可結。何政可亂。卽如目前計典。自有主察諸臣。虛公諮訪。雖惟炳不得而專。何況於臣。不過與臣同垣諸臣。循例繳單。何把持之有。國觀試一自反。昔與崔魏同朝。衆危獨安。有何品骨。而反詆臣等之忤璫。見逐者。爲黨爲奸。何其敢於欺我堯舜也。二十八日。恭候召對。臣與閻可陞面質。臣何嘗有國觀不肯上疏。想要番局等語。此臺省諸臣集文華門。所共聽聞者。國

觀亦可謂說夢矣。至東林二字。乃書院之名耳。神祖朝。顧憲成抗爭國本。歸臥林下。曾講學其間。今其人與骨已朽矣。頃國觀同鄉。臺臣楊建烈一疏。言之甚詳。屈指講學時。臣尙爲諸生。有何主盟。臣猶記熹宗朝媚黨諸臣。一網正人。必硬坐以東林。誅夷削逐。殆無虛日。幸賴聖明。顯忠遂良。往者贈卹。生者錄用。臣雖譴劣。亦濫賜環。回首縉紳慘禍。曾幾何時。而國觀又忍以東林二字爲阱也。豈當年飮聞斯語。今魂夢中猶自不忘耶。若夫袁耀然與臣素昧平生。三千里而遙拜疏。豈因臣使耀然疏至。道路喧傳。不獨臣聞之也。臣如主使耀然。又肯吐露於國觀同邑閭可陞之前哉。況御史糾彈。是其職掌。必懸坐以主使。則國觀在先朝參劾諸臣。又是誰爲主使乎。亦可對照而自明矣。臣就疏駁正。不敢旁溢一語。聖明自有洞鑒。通國自有公論。伏乞敕下九卿科道。從公會勘。臣是否結黨亂政。國觀是否說謊欺君。并敕袁耀然從實回奏。與臣曾否一面。其前疏曾否係臣主使。一一直究到底。庶是非明。邪正辨。而紛囂可息。計典不撓。臣卽退伏。猷。將終身頂戴聖恩矣。疏入。報聞。不必會勘。

三垣疏稿卷二

工垣 六疏

流賊漸逼東南等事公疏

工科等衙門都給事中等官臣許譽卿等題爲流賊漸逼東南根本重地可慮懇乞敕部速議以安陵寢以固陪京以護運道事竊照流賊發難以來秦晉畿豫楚蜀無處不受其殘破良繇不蚤設總督逆扼之於河上致饑民從賊賊黨日繁縱橫四突莫可收拾耳今楚豫間復滿地皆賊傳聞且攻陷臣鄉潁州矣夫潁州固鳳陽之門戶也門戶破則鳳陽岌岌難保祖宗湯沐重地且陵寢在焉此時不知如何震動也雖有總漕臣楊一鵬移鎮顧兵不過新募二千餘皆市人耳鳳陽又無城可守無險可據何以控賊今兵從西北追賊必從東南走其勢然也少有不戒致犯我皇陵一杯土一枝木將祖宗發祥之自億萬世靈長之脈其謂之何是豈臣子所忍言哉亟當敕部於近調各兵將中抽五千人統以知兵一大將星赴鳳陽聽總漕節制往來策應力遏其繇豫入吳之路如是則陵寢可安也此外由楚入吳則安慶其門戶矣操臣馬鳴世標下特沿江汎口兵耳近見楚中諸臣疏稱賊已水陸並進則水營之兵當駐小孤設防誠不可不預至陸路從黃梅而來則風雨驟至一兩日可到我兵勢不能舍舟登陸雖有操臣移鎮安慶但

安慶新募兵不滿千。器甲未利。戰鬪未習。何以當楚之衝。亦當敕部於近調各兵將中。抽五千人。統以知兵一大將。星赴安慶。聽操臣調度。水陸犄角。力遏其由。楚入吳之路。如是。則陪京可固也。不獨此也。江淮運道。南北咽喉。乃國家命脈所關。一旦中梗於賊。數百萬漕艘。何由飛渡。京師及關。寧皆仰給於茲。豈京坻爲不涸之府。而嗷嗷者。能免脫巾之呼乎。且財賦半出東南。凡京邊起解錢糧。取道何地。寧有神運鬼輸之術。而太倉亦坐困矣。言念及此。不寒而慄。知皇上自爲東南根本計。遣將調兵。又不待臣等之合詞籲天也。至兵行糧從。除地方額兵外。新調各兵。自應照別省例。將八年之額餉。聽總漕及操臣便宜留用。兵屬總漕者。餉派廬鳳四府。兵屬操臣者。餉派應安六府。就近起解軍前。俟賊平銷算。諒總漕及操臣實心任事。必能釐餉不至虛糜。蓋同是朝廷封疆。而臣鄉爲陵寢。陪京運道攸係。更比別省不同。臣等竊謂計臣明而熟於事者。當不作秦越視矣。臣等忝列言路。目擊賊氛甚惡。念國家根本重地。不憚瀝血控陳。不獨爲桑梓一身一家計而已也。伏惟聖斷。立賜敕部施行。疏入。帝從之。

皇陵被燬等事疏

題爲皇陵被燬。臣子痛心。直發誤國之罪。仰祈聖鑒事。頃者賊氛南向。震及皇陵。諸臣交章。尙無確據。昨接該撫按揭。則賊已焚燬明樓及享殿等處矣。祖宗三百年來。王氣鬱蔥。發祥悠遠之脈。何堪盡付流賊之一炬。臣思士庶之家。丘壠樹木。偶爲盜傷。亦必飲痛無已。況我皇上孝治天下者乎。一聞此變。撤講減膳。修省不遑。必自以爲負痛於祖宗矣。願皇上御極數年。敬天愛民。法祖勤政。無一事可以致譴。無一念

可以召災。何故天不悔禍至此。除撫按兩臣。罪無可逃外。誰實司邦政。誰實平章軍國。臣於是不能不深恨諸臣之誤國也。臣擢指餘生。兩蒙召還言路。漫無獻納。上報主恩。值此祖宗怨恫。聖明震惕。臣若畏禍不言。誰當言者。且日來樞臣聞言。輒思卸擔。而輔弼大臣。炤常視事。絕未見有一人席藁待罪。仰分至尊之痛憤者。臣亦不勝髮指。請兩言直發其罪曰。樞臣固位失事。臣輔玩寇速禍而已。曷言樞臣之固位失事也。方賊在秦晉。早設一督臣。扼其渡河。禍止西北一隅耳。乃侍郎彭汝楠規避不行。恐推別督。則樞貳無色。樞臣遂囁嚅不敢議設。人有詰之者。則曰。政府不肯設也。蓋畏政府。不得不并畏政府之私人也。迨賊入豫楚。汝楠被論。始議設督。而汪慶伯者。猶夫汝楠耳。因推及極邊之陳奇瑜。而鞭不及腹。又制於撫賊之一說。心持兩端。致以撫誤勦。而賊乃再蹂躪東南矣。皇上試查會典。載左右侍郎。原備總督之用。何以久持不決。坐失事機。且既設五省督臣。非爲勦賊而何。柰何輕信招安。釀成今日之決裂哉。樞臣卽欲諱其不以固位失事。不可得也。曷言輔臣之玩寇速禍也。蓋流賊發難幾年矣。流毒幾省矣。東南根本重地。陵寢運道攸關。增兵預備。不待智者而決也。昨春。臣鄉諸臣。早言及此。樞臣不悟。直至昨冬。東南震鄰。人心搖動。始有淮撫操江移鎮之疏。識者已病其晚。及奉旨。則曰。不必輒議移鎮。以滋惶擾。臣觀各地方。稍有兵力。賊皆偵探。不入其境。蓋擣堅難。而襲虛易。賊亦料之審矣。鳳陽何地。陵寢何事。皇上試查。樞臣具疏。在十二月下旬。使朝上夕允。嚴限移鎮。計數日報。至淮上。必在正月初旬。撫臣畏明旨。亦必星馳駐鳳。去賊十五日。至鳳焚劫。尙有數日之暇。正堪整旅堵賊。不至禍延皇陵也。輔臣是何肺腸。而欲緩之。遂

視陵寢爲孤注耶。彼民間見盜賊蜂起。亦各思保有墳墓。何況皇陵爲聖子神孫億萬世靈長之自。豈不當蚤爲呵護。乃今使樞臣以曾請移鎮爲藉口。撫臣又以不必移鎮爲藉口乎。輔臣卽欲諱其不以玩寇速禍。何可得也。臣在班行。與輔臣各止一面。其於樞臣。且效有忠告。豈有意摘發。而日擊皇陵如燬。聖心如傷。忠憤所激。一切不暇瞻顧。伏乞皇上敕問樞臣。不必設督之議。是誰主張。敕問輔臣。不必移鎮之旨。是誰票擬。各宜明認誤國之罪。今而後。賊氛作何掃蕩。東南半壁。作何鞏固。毋徒素服角帶。區區循修省故事。庶可少慰祖宗在天之靈。臣卽言出禍隨。甘之若飴矣。疏入。得旨。皇陵震驚中外。當事諸臣。何所逃責。總督不輕議設。原爲難於得人。且恐開各撫諉卸之路。旣設不效。咎自有歸。前賊在郟境。應淮江川等撫。應否遽令移鎮。況偵探聲援。相機進止。卽於旨內嚴飭。何僅單摘一言。反爲弛玩開卸。該部知道。

剖質疏糾疏

題爲微臣疏糾。僅止於誤。輔臣疏辨。似涉於欺。敬因明旨。再一剖質。仰祈聖鑒事。臣居言路。浮沉日久。兼以母老。時擬陳情。因聽斥幽。未敢遽請。然於壇工。敍及一疏。略已入告。頃蒙倖免。方欲乞恩歸養。忽聞賊陷潁州。又聞賊焚陵寢。臣痛憤幾不欲生。且念堯舜在上。遭此古今希有之變。實罪由臣下。遂具直發誤國之疏。糾及樞輔諸臣。臣疏語虛平。未知不必移鎮之旨。係誰票擬也。已見輔臣溫體仁再疏引咎。亦自謂誤國已甚矣。但臣所不解者。稱引古人善則歸君。過則歸己一語。蓋古者惟君有過。臣引爲己辜。始謂之歸己耳。今臣云。皇上敬天愛民。法祖勤政。無可致譴。召災。輔臣亦云。敬天率祖。勤政愛民。自宜感和。召

祥似謂臣言非誣。皇上更有何過。欲歸臣下。豈封疆敗壞。陵寢燬傷。非輔臣玩寇之罪。而乃欲爲皇上分過耶。亦悖甚矣。又見臣疏奉聖旨。皇陵震驚中外。當事諸臣。何所逃責。總督不輕議設。原爲難於得人。且恐開各撫委卸之路。既設不效。咎自有歸。前賊尙在鄖境。應淮江川等撫。應否遵令移鎮。況偵探聲援。相機進止。卽於旨內嚴飭。何僅單摘一言。反爲弛玩開卸。該部知道。欽此。臣再三捧釋。多所未明。赫赫明綸。若爲輔臣解嘲者。臣職司封駁。又安能嘿嘿已也。旨云。總督不輕議設。原爲難於得人。夫會典明載。兵部侍郎。可付以提督之任。何以稱難。卽不得其人。將付流賊於度外乎。何彭汝楠被論。又奉有任樞勤練。不必苛求之旨乎。旣可以佐樞。又不可以任督乎。此臣之未明者一也。旨云。前賊尙在鄖境。應淮江川等撫。應否遵令移鎮。臣查樞疏奉旨時。豫撫玄默有闕二字。官兵合剿一疏。已奉有賊勢重大闕二字。則賊闕一止在鄖境矣。豫鳳接壤。陵寢重地。竟當漠然乎。臣未遠引。昨年。宣雲失警。晉撫移鎮代州。賊擾中州。鄖撫移鎮襄陽。蓋重封疆耳。何楊一鵬移鎮鳳陽。旨謂不必輒議。豈陵寢反輕於封疆。設當時移鎮。而賊不至。不猶愈於賊至而陵寢被燬。驚及祖靈乎。此臣之未明者二也。旨云。何僅單摘一言。反爲弛玩開卸。臣查樞疏稱。賊走黃梅。江南鼎沸。折而入豫之江歸。齊魯淮揚一帶騷然。蓋專爲移鎮而請。則不必移鎮一言。政稟擬中。喫緊誤國處。臣特爲拈出。何云單摘。至臣疏首言。撫按兩臣罪無可逃。又誰爲開卸乎。臣不知逮問楊一鵬等之旨。果盡由閣擬乎。抑出聖怒獨斷乎。如未必盡由閣擬。則開卸之罪。責在輔臣。而豈在臣乎。此臣之未明者三也。臣草疏畢。又見體仁罪狀自明一疏。大都依傍前旨。而設詞甚苦。如不必設督。自

認誠有是言。獨諱汝楠爲其私人耳。夫汝楠輩爲政府私人。通國皆能言之。非臣一人之浮言也。若謂不必移鎮。詞甚圓活。則更可異焉。王言如絲。其出如綸。輔臣獨不聞乎。況鳳陽何地。移鎮何事。柰何以圓活出之。圓活二字。模稜之別名耳。所望救時大臣。平章軍國。當直捷主張。毋持兩端。臣又安知輔臣胸中。先有圓活二字。爲今日卸罪之地也。臣所謂欲掩其誤。似蹈於欺者。輔臣不已情見乎詞哉。夫欺者。人臣大罪。臣何忍輕議。然輔臣不幸而有其迹矣。輔臣如翻然憬悟。請抒其盡畫。宏濟時艱。除兇雪恥。毋再以賊貽君父。庶幾少贖前罪。誠如是。則皇上卽罷斥微臣。以謝輔臣。臣方將肉袒以請。又何敢置一喙也。疏入。得旨。前旨已明。何得恣辨求勝。

究誤國之原疏

題爲聖心方在焦勞。臣言不宜煩聒。略究誤國之原。再祈聖鑿事。日者臣目擊寇禍。兩疏誤國之罪。輔臣一辨一不辨。臣似可無言。且衆言紛囂。聖心必厭。因而謫及言者。臣若爲臣一官起見。臣更不宜復言。然臣有不敢不言者。臣前疏。但陳誤國之罪。而猶未及究誤國之原也。何謂誤國之原。則票擬與封駁失職耳。臣查祖制。大學士一官。原以備顧問。至世廟。而票擬之權始重。凡部院撫按。何事不取裁焉。何者。票擬固筆代天言。未可以己意參焉者也。故票擬得失。則理亂之關也。至六科給事中。小臣耳。而祖制。凡章奏必下科。其奉旨有未當者。皆得循例封駁。蓋取古有失輒諫之議。非重科臣也。所以尊朝廷。而防大臣蒙蔽之漸也。故封駁得失。則又理亂之關也。而今何如耶。輔臣朝入暮出。非不曰勞。日取一二刑名錢穀等

事瑣屑批駁。非不曰煩。但遇邊庭交訐。盜賊縱橫。治亂安危所係。實未確有一言。俯折廷議。仰贊廟謨。卽如淮撫移鎮一事。旣以不必二字速禍。復以圓活一語卸罪。此等票擬。不可謂不瀟灑矣。而尤可異者。則互相庇護。牢不可破之私也。如甲被言。則乙擬溫旨以慰之。乙被言。則甲擬溫旨以慰之。夫今日有君無臣。致釀寇禍。我皇上聖不自聖。方以不德引咎。而何於誤國之臣。不曰忠悃。則曰盡畫。不曰絕私奉公。則曰宏濟時艱。臣不知時事至此。所謂忠盡何在。奉公濟艱者何事。豈皇上有罪己之詔。而輔臣不當席藁待罪。乃侈口交美如此耶。若宣諭原屬特恩。數煩王言。體已大褻。邇來聞有代爲請宣者。未知昉於何例。得無敢於要恩。爲扶同飾罪之地歟。綸扉一席。有此護法。毋怪乎誤國之相尋也。至封駁之義。則於闕二然矣。臣先年在垣。猶見乞恩偶濫。雖經奉旨。間爲封繳。其他用人行政。一切邪正是非。未嘗不據理駁正。今無能如昔之封還。卽奉旨而駁者幾何。駁而蒙改正者又幾何。雖或事事出於聖斷。然皇上一日萬幾。宵旰靡及。輔臣票擬。豈無朦朧玩誤。如不必移鎮之旨。爲聖明偶不及察者乎。諸臣未聞一言救正。斯亦封駁之失其職矣。而尤可異者。則閣揭奉旨。間未下科。不知始自何年。臣查凡係兵機重情。奉旨密封本章。亦必下科。而後送部。彼閣揭何事。豈可入告皇上。獨不可明示廷臣耶。甚至被言具揭亦然。何更示人以不公也。倘有背公徇私等弊。六科又烏從而駁正之。臣故不揣狂瞽。惟願皇上取輔臣票擬。擇其重者。必詳覽處分。若一二言者駁及。輔臣必察其言之當否。言而不當。無所逃責。倘言而或當。毋令互相庇護。重襲明綸。庶幾票擬封駁。兩得其職。則輔臣不敢終於誤國。而皇上數年勵精之天下。亦可撥亂而爲治。

矣。臣此疏一出。輔臣不知何如。中臣顧臣無媚骨。在先朝因觸姦輔。落職以去。況今事堯舜之主。立睿謬之朝。更何忌諱。忍負我皇上。而結舌不言哉。惟皇上裁察。疏入得旨報聞。

朝廷敕法宜一等事疏

題爲朝廷敕法宜一。輔臣溺職宜明。謹補牘再陳。仰祈聖斷事。臣聞帝王御宇。所以磨勵臣工者。法之一字而已矣。若法行於小臣。而不行於大臣。法行於遠臣。而不行於近臣。雖帝王不能以治天下。我皇上登極以來。英斷夙成。行法無所假貸。往不具論。就臣再廁班行。伏見諸臣奉職無狀。法在必懲。固也。卽一二言官。論列執政。語或激戇。輕則鐫級。重則謫處。又重則究問。若是其不少貸矣。猶曰。此庶僚也。進而求之。督撫大臣。建牙未幾。斥逐已及。輕則鐫級。重則褫職。又重則究問。亦若是其不少貸矣。猶曰。此邊吏也。進而求之。六部大臣。體貌雖優。譴責時有。輕則鐫級。重則褫職。又重則究問。亦若是其不少貸矣。夫皇上之不輕貸諸臣。豈過爲苛求哉。亦曰。寓敕法之意於課職之中耳。若輔臣。則以票擬爲職者也。如淮撫不必移鎮之旨。實實誤國。亦實實誤陵。乃藉口相機進止。欲掩厥罪。不知賊氛飄忽。如風雨驟至。與其相機而後進。何如先事移鎮。不致坐失事機乎。當陵警初聞。輔臣溫體仁等合詞引罪。奉旨有云。卿等佐理中書。與經事不同。夫曰不同。則但有輕重之分。不得置身事外明矣。臣竊謂撫按有撫按之罪。輔臣有輔臣之罪。臣三疏入告。無一語輕請罷斥。蓋以黜陟功罪。在皇上獨斷。而進退廉恥。聽大臣自裁耳。兩月以來。輔臣安心入直。退食委蛇。今撫按兩臣已下詔獄。且奉旨駁審矣。而輔臣日入中書。絕未有席藁待罪之意。

得無謂此番禍及皇陵。經事之撫按。法自難逃。爲輔臣者。佐理溺職。獨超然免於評論耶。而聖意淵微。亦未見顯有處分。或者以輔弼大臣。地近密勿。我皇上課職之法。至此而亦姑示優容也。臣嘗伏而思之。往年輔臣如劉鴻訓。錢龍錫。相繼遣戍矣。卽久歷邊疆之孫承宗。亦奉旨閑住矣。頃寇墮中都。火傷陵寢。實繇不必移鎮一語。階之爲禍。豈皇上課職之法。至今日之輔臣而頓廢哉。臣始終以爲玩寇速禍。輔臣焉得無罪。直在皇上之一怒而已。抑年來論輔臣者。當否非臣所知。然皆庇私納賄。一身一家之事。其於誤國猶小。獨此皇陵震驚。祖宗怨恫。聖心有在天之隱痛。臣誼有率土之公憤。此之誤國。更孰有大焉者。臣職難隱默。敢不避屢瀆。伏候聖斷。倘臣言無當。不得其言。則去。臣之責也。仰祈皇上立賜罷斥。以爲言者之戒。若以臣實妄言。而仍使濫竽言路。則功罪不明。是非兩混。此亦聖明之世。法之所不敢出矣。疏入。帝不納。

陵工宜敍等事疏

奏爲陵工宜敍。濫恩當裁。謹懇辭復級。并循職駁正事。臣近患痰暈。註籍再疏。求放間。伏祝工部爲慶陵。敍工。臣亦奉旨。准復原級。臣不覺愧悚無地。因臣疏乞休。靜候俞旨。未敢控辭。乃昨復奉旨。隨著臣遵旨供職矣。臣豈敢靦顏仰叨此無勞之敍哉。思去冬農壇類敍。臣曾疏辭。不蒙准免。復臣一級。臣已慙無報稱。茲先帝陵工。臣子奔走。其分也。何敢言勞。且臣身非經事。雖從諸臣後。偶一相度估計。不過與同官郭九鼎諸臣等耳。非若部臣李遇知。程紹。苦心鳩率。鬚髮爲白。同官范淑泰。臺臣梁天奇。司官張一鳳等。戮

力巡督。面目爲黑。有寒暑拮据之勞也。今九鼎等僅止頒賞。而臣獨蒙復級。臣不惟有愧於遇知等。并有愧於九鼎等矣。況部疏初敍。曾經駁查經事久近。明旨昭然。臣竊謂旣曰經事。則廷臣中除遇知等數人而外。恐指未可多屈。如臣碌碌因人。何敢貪人之力。以爲己勞。臣曾向部臣力言之。乃部臣誤而敍復。輔臣誤而擬復。致明旨亦濫及不經事之微臣。不亦勞逸幾無分別哉。此臣反覆思維。誼難冒承。不容不瀝血辭免者也。伏乞皇上察其無勞。仍令降級自效。倘臣病旦夕可痊。容覬勉供職。或邀異日宥過之仁。則聖恩不濫。而愚分亦安矣。臣草疏間。又見吏部接出聖諭。輔臣溫體仁等。以加恩晉少師等銜矣。臣因思慶陵皇考之陵。皇陵皇祖之陵。我皇上之孝思同也。輔臣前聞陵警。旣以職在佐理。未與經事者同罪。今敍陵工。又以勞在贊理。遂與經事者同功。傳之史冊。將陵寢同而功罪異。得無謂朝廷之法。罰有侏而賞太濫乎。雖恩出自上。而輔臣清夜捫心。亦當自愧矣。臣方求去。不宜復言。但敍工係臣垣職掌。臣雖在病中。一日未去。則言責一日不可不盡。故輒因懇辭復級。而并及之。疏入得旨。許譽卿復級。已有旨。不得借端託辭。

明史本傳

許譽卿字公實。華亭人。萬歷四十四年進士。授金華推官。天啓三年。徵拜吏科給事中。疏言。錦衣世職。不當濫畀。保姆奄尹。織造中官李實。誣劾蘇州同知楊姜。侵撫按職。中旨謂姜賄譽卿出疏。停譽卿俸半年。楊漣劾魏忠賢。譽卿亦抗疏極論忠賢大逆不道。視漢之朋結趙嬖。唐之勢傾中外。宋之典兵矯詔。謀間兩宮何異。忠賢大怒。又言。內閣政本重地。而票擬大權。拱手授之內廷廠衛。一奉打問之旨。五毒備施。邇復用立枷法。士民槁項斃者。不知凡幾。又行數十年不行之廷杖。流毒縉紳。豈所以昭君德哉。祖制宦官不典兵。今禁旅日繁。內操未罷。聚虎狼於蕭牆之內。逞金革於禁闥之中。不爲早除。必貽後患。於是忠賢怒益甚。會趙南星。高攀龍被逐。譽卿偕同列論救。遂鑄秩歸。莊烈帝卽位。誅崔魏。將大計天下吏。奄黨房壯麗。安伸。楊維垣之徒。冀收餘燼。屢詔起廢。輒把持。使不得進。引其同類。譽卿時已起兵科給事中。具疏爭。吏部尙書王永光。素附璫。讎東林。尤陰鷲。詔定逆案。頌璫者卽黨逆。永光嘗頌璫。治逆案。陰護持之。南京給事中陳堯言。疏劾永光璫孽。不當正銓席。然帝方眷永光。責堯言。譽卿又抗疏爭。於是都給事中薛國觀。以己亦璫孽也。遂訐譽卿。及同官沈惟炳。炳東林主盟。結黨亂政。譽卿上疏自白。卽日引去。七年。起故官。歷工科都給事中。明年正月。流賊陷潁州。譽卿請急調五千人守鳳陽。疏入。而鳳陽已陷。皇陵毀焉。譽卿痛憤。直發本兵張鳳翼。固位失事。及大學士溫體仁。王應熊。玩寇速禍罪。賊在秦晉時。早設總督。遏其

渡河。禍止西北一隅耳。乃侍郎彭汝楠避不肯行。及賊入楚豫。人言交攻。然後不得已而議設之。侍郎汪慶百又避不行。乃推極邊之陳奇瑜。鞭長不及。釀成今日之禍。非樞臣之固位失事乎。流寇發難已久。樞臣因東南震鄰。始有淮撫操江移鎮之疏。識者已恨其晚。及奉旨。則曰不必移。劉達及給事中楊枝起相繼論薦。竟不果用。福王立。起光祿卿。不赴國變。薤髮爲僧。久之卒。